

DISSERTATIO MEDICA INAUGURALIS,  
DE  
**AFFECTIBUS**  
**GRAVIDARUM,**

Quam,

DEO T. O. M. CLEMENTISSIME ANNUENTE,

RECTORE MAGNIFICENTISSIMO,

SERENISSIMO PRINCIPE AC DOMINO,

**DN. PHILIPPO WILHELMO,**

PRINCIPE BORUSSIAE, MARCHIONE BRAN-

DENBURGICO, DUCATUS MAGDEBURGICI

VICARIO, RELIQUA,

GRATIOSO AMPLISSIMÆ FACULTATIS MEDICÆ  
CONSENSU,

IN ALMA REGIA FRIDERICIANA,

SUB PRÆSIDIO

**DN. GEORGII ERNESTI STAHL,**

MED. D. EJUSDEMQUE PROFESS. PUBL. ORDINAR.

h. t. DECANI,

*Dn. Patroni, Præceptoris ac Promotoris sui omni Pietatis cultu  
ætatem devenerandi,*

**PRO GRADU DOCTORIS,**

Summisque in ARTE MEDICA Honoribus & Privilegiis  
legitimè capeffendis,

IN AUDITORIO MAJORI,

*Addiem*

*Sept. A. MDCCVIII. horis ante & pomeridianis*  
Publicæ Eruditorum Disquisitioni submittet

**DAVID DITTMANN,**

Vilnâ-Lithv.



VIRO

PRÆ-NOBILISSIMO, EXCELLENTISSIMO,  
AMPLISSIMO ATQUE EXPERIENTISSIMO,

DOMINO,

DN. GEORGIO  
ERNESTO STAHLIO,

MED. D. EJUSDEMQUE IN CELEBERRIMA HAC  
FRIDERICIANA PROFESSORI PUBLICO ORDINARIO FA-  
MIGERATISSIMO, GRAVISSIMO, h. t. DECANO  
SPECTATISSIMO,

Domino Patrono, Præceptori atque Promo-  
tori suo omni Observantiæ atque Pie-  
tatis cultu æternùm suspiciendo,



*Felicitatem & Officia!*





Vandocunq; Clementissimam in dirigen-  
dis rebus meis PATRIS COELESTIS Provi-  
dentiam apud animum exactius reputa-  
re, TUAMQUE, VIR EXCELLENTISSIME, in  
tenuitatem meam per hocce, quô mihi Halis vivere  
contigit, tempus impensissimè collocatam Benevo-  
lentiam mente volvere evenit, non potui non læto  
semper, cum intimæ tamen Venerationis pleno ani-  
mo in humillimam paternæ Ejus Misericordiæ admi-  
rationem rapi, quòd, præter infinita illa Gratia suæ a-  
nimæ meæ præstita documenta, TE mihi Præcepto-  
rem fidelissimum, Patronumque & Promotorem stu-  
diorum meorum tam munificum concedere haud de-  
dignatus sit. Sicuti autem divinæ Majestati me meaque  
cuncta conamina toto pectore trado, & Sanctissimæ  
Illius Voluntati juxta ac Sapientissimæ ulteriori Di-  
rectioni me totum permitto, nihil magis in ardentis-  
simis votis habens, quàm ut me miserum, constantis-  
sima Spiritûs sui gratiâ benè firmatum, instrumentum  
Gloriæ suæ concelebrandæ, imò promovendæ ido-  
neum esse jubeat: ita, cùm, sic Volente DOMINO,  
huic loco valedicere veniat, Tuorum in me benefici-  
orum nequaquam immemor, ut vel levissimum quod-  
dam gratæ atque obstrictissimæ, quam erga TE, Pro-  
motor ætatem æstumatissime, semper fovi, men-  
tis extet monumentum, meritò sum sollici-  
tus. Equidem perquàm optimè mihi conscius sum,  
vires meas fidelitati, benevolentia atque munificen-



tiæ in me Tvæ condignè deinerendæ, per omnia prorsus esse impares, ne tamen ita sine ullo Observantiæ & devotissimi in TE animi testimonio hûc loco pedem moveam, concede VIR EXCELLENTISSIME, ut alios videns mortales esse, propriæ quoque fragilitatis minimè oblitus, primam hancce, quæ se offert, occasionem mei juris faciam, & in nunquam intermorituram Reverentiæ & Pietatis memoriam hæcce Pagellas TIBI humillimè offeram, consecrem. Suscipe eas animo, qualem ego, nihil quicquam promeritus, constanter expertus sum, benevolentissimo. Suscipe, inquam, cum iis pia vota & ardentes preces, quas, uti hæctenus feci, ita & in posterum pro Salute & omni-gena Tui, Tvorumque benedictione divinâ perennanter fundere nunquam cessabo. Vale interim, iterum iterumque Vale, Patrone singulariter Colende cum Tvis in longissimam annorum seriem semper felix, incolumis, beatus, atque mihi in longè etiam disfitis locis ulterius fave

EXCELLENTISSIMI ET AMPLISSIMI NOMINIS TUI

quoad vixero,  
devotissimo, deditissimo  
DAVIDI DITTMANNO.





I. N. J. A!

## PROOEMIUM.



*U*liorem bis pati morbos, vetus est, inde ab *Hippocrate*, dictarium, nec quidem etiam, si cum moderatione accipiatur, contemnendum; dum utique & *promptius*, & pluribus *schematibus*, mulieres aegrè habere, experientiae minime refragatur. Interim, sicuti super irritò fundamento hujus rei causam collocavit Antiquitas, & inprimis decantatam illam *Uteri*, ceu alterius *Viventis in Vivente*, sensibilitatem & impatientiam; Ita, licet hoc de *Utero* non ita se habeat, sed planè aliarum partium sint illi, qui arguuntur, tam *sensûs*, quàm *motûs*: Nihil, nisi solo *respectu* ad scopos, ipsi *Utero* competentes, concurrente: Cum tamen non planè de nihilo sit, tum quòd ipsæ *fœminæ* ægritudinibus promptius expositæ sint, tum quòd multæ harum, etiam *Uterum*, si non æquè directè & physicè, tamen *finaliter*, respiciant: non injusta hinc censerì potest curiosior passim evolutio, quinam maxime morbi huic *Sexui*, verè præ *Viris*, impendeant, & quas considerationes partim postulent, partim mereantur.



tur. Quamvis enim prolixissimis, ad Veterum morem, distinctionibus *morborum muliebrium* insistere, certè supervacuum fuerit; dum ingens illorum turba, sub *Hypochondriacæ* turbationis censu simplicius comprehendimeretur, neque proprias ditiones tueri valet; ita esset sine dubio melius fundata illa disquisitio, quam obrem propriè foeminiño sexui, hæc ipsa *hypochondriaca* pathemata, tam ita fortiora, quàm multiformia, & sub diversis quasi larvis difformia, magis eveniant, quàm ipsi virili sexui? Quod si rectè declaratum fuerit, decedet non solum benè multum de opinione tantæ *multitudinis* & realis varietatis, *muliebrium* morborum: sed comparebit insimul etiam sincerior aditus, ad *curationes* varias, ex ipso vero fundamento, quò cohærent talia affectuum *schemata*, instruendas. Interim, licèt hæc vulgata opinio de *vivo in vivente*, & inde prognascente majore *sensibilitate*, imò verò ad subeundos actuales morbos proximâ dispositione, firmo fundamento destituatur, intelligendo de *Utero* directè, simpliciter, & sine tropo: admittit tamen applicationem *tropicam*, quâ nempe non inusitatum est, Rhetoribus & Poëtis *Continens pro Contento* nominare, & *Uteri* nomine etiam ipsum, qui in illo *containeri* solet, & quasi debet, *foetum*, designare. Quò ipso tamen sensu, quamvis nondum verum sit, quòd mulier, nempe etiam *utero gerens*, simpliciter juxta vim vocis, *morbos bis patiatur*: cum tamen illud satis certum sit, quòd foemina, *utero gerens*, exposita ad minimum sit magis, pluribus & facilioribus morbi insultibus, quàm *vacuâ* hac parte: imò verò non solum sui corporis causâ, quatenus vivi & sensibilis, habeat quod timeat; sed etiam *infantis* sui intuitu, ipsius etiam, ut *vivi* atque *sensilis*: imò propter hunc *communi*



*inani* quodam respectu, *Vita* tam suæ, quàm ipsius infantis: meretur propterea hæc res considerationem utiq; non superficiale, tum ratione veritatis facti ipsius, quousque illud verè atque rectè sese habeat: tum ratione specialium circumstantiarum atque casuum, quibus maximè modis hæc constitutio, nempe quomodo scemina, *propter infantem* in utero ejus hærentem, & vitæ ejus intuitu, variis sanitatis periclitationibus exposita vivat. Cum autem mihi incumbat solenne, quod vocant, INAUGURALE SPECIMEN studiorum meorum proferre, atque publicè tueri, placuit hanc ipsam partem Medicæ Pathologiæ atque Therapiæ pro Themate assumere, nempe DE GRAVIDARUM AFFECTIBUS, earumque tam causis, quàm remediis, agere.

Largiatur DEUS T. O. M., ut hoc negotium salubris propagationis generis humani rectè observandæ, & à periculis atque damnis vindicandæ, pro rei dignitate decenter declarandi optato scopo rectè potiamur!

### Th. I.

**D**E GRAVIDARUM AFFECTIBUS dum agere aggredimur, subit mentem consideratio, neque frivola, aut inani speculabundâ curiositate subnixa, nec usûs, quem habet, exigui, sed ad totum verum fundamentum *solide Pathologiæ*, *solitæ* verò inanis *speculationis*, de morborum causis, consulationem, pertinens. Nempe, cum, auctore, aut ad minimum falso teste, jam ipso *Hippocrate*, œconomia corporis humani *viventis*, arguatur, morbis adeò exposita, imò obnoxia esse, ut inde totum corpus, *totus*, inquam, *homo*, juxta nudam in terminis loquendi formulam, *morbidus*, imò *morbus*, appellari mereretur: adeoque huic ita præfigurata



ta constitutioni, non solum quælibet *obvia*, imò passim *frivola*, sed etiam, quia dictæ illud omnes homines onerat, omnibus etiam *communes*, imò *communissima*, ægrotandi causæ hinc imputentur & assignentur: Interim, si animus rectè atque decenter advertatur, nequaquam verum hoc deprehendatur, quòd omnis homo, *omnes*, inquam, & *singuli homines*, ad morbos, inprimis *quoslibet*, ita temerè & facillimè subeundum; exquisitè, & quod ajunt, *in proxima potentia*, dispositi existant: ante omnia verò illis morbis, ad quos quàm maximè *proximè dispositi* videri possent, minimè omnium ipso actu ita facilè corripiantur, sed diu multūq; vivere possint ab illis securi, intacti, sani atque integri: Ex hâc re propterea certe tria maximè colligere, atque de illis dispicere convenit. 1) Quòd, & quomodò, *materialis* dispositio corporis, quantumlibet *fragilissima* & corruptioni utique promptissimè obsequens, nihilo seciùs ad ipsum *actum* corruptionis, minimè tam promptè perveniat: 2) Quænam maximè circumstantia & conditio, œconomix corporis *viventis*, verè magis *intrinseca*, præcipuam culpam subire possit atque soleat, labefactionis sanitatis ac integritatis ejusdem, tanquam domestico dissidio. 3) Quanta hîc sit energia *adventitiarum* demum, externarum causarum, œconomiam corporis humani perturbantium: 4) Quænam maximè ratione hoc faciant, non solum præsentissimè, sed etiam potentissimè: in quam, inquam, *partem* aut *actionem* corporis præcipuè agant, & per hanc confundant totam œconomiam.

## II.

Sanè verò, præbet huic considerationi generaliori occasionem, etiam nostri Thematis, muliebris sexûs in statu *Graviditatis*, peculiaris planè, secundùm hunc respectum, pariter evidens, constitutio: quâ videlicet affectûs *Gravidarum*, rectè secundùm veritatem æstimando, etiam ipsi sunt aliquid MINUS FREQUENS: minimè, inquam, omnibus atque singulis gravidis ita promptè obtingens, nedum familiare, uti quidem usitata Scholis Medicis opinio inferre videtur: sed ita reverà oppidò



pidò RARUM, ut vix centesima quæque, imò non errarem, si multò plures numerarem, è quibus vix una gravida, affectibus illis peculiaribus corripiatur & exerceatur. Ut enim taceam Gentes, ab animi æquè, atque corporis mollitie alieniores, sed simplici s. n. vivendi rationi magis acquiescentes, tam *Africa*, quàm *Americæ* incolas, imò *Hyperboreorum Scytharum Nomadum*: Certè, uti inter medias *corruptorum morum* nationes, (*cultos* vocant, in hóc certè passu ipsius juventutis corruptores, sub verborum lenocinio, res & animos pervertentes,) quibus quàm minimum favet occasio corruptelis his indulgendi, longè maximus numerus *rusticarum*, & moderatiorum *plebejarum* foeminarum, quotquot *frugalitati & laboribus* addictæ sunt, ab illis etiam affectibus, de quibus sermonem capessimus, magis immunes sunt: Occurrunt etiam satis numerosa exempla talium foeminarum *gravidarum*, quæ vel coactæ *ferre, quod mutari non potest*, nihil fallacem distinctionem suppeditant, quid *verorum*, quid *factorum & affectatorum* affectuum, *gravidis, quæ talibus*, verè impendat ac incumbat. De foeminis loquor ex oppidana æquè, atque rustica plebe, quæ ab infantiâ laboribus & famulatio præstando adsvetæ, tandem *castra sequi* suscipiunt: Utpote quæ magno numero passim documenta præbent, *quid foemina possit?* Tam *adsveta*, quàm passim *necessitate* adacta, ad leviter tolerandum, quod alia, commoditatibus *animo* maximè inhærens ac invigilans, *non posse*, verisimile reddit.

### III.

Nempè ex hac circumstantia dilucescit illud utique, quòd non tam *absolutè & simpliciter gravida* foemina, è *corporearum* circumstantiarum rationibus, ad *ægrotandum* verè aptior atque pronior existat; sed magis à peculiaribus *individualibus*, & inprimis *moralibus*, causis, dependeat illa *teneriorum* atque *delicatarum* gravidarum, *sollicitarum* inprimis atque *meticulosarum*, aut etiam simplicius nimis *desidum*, veluti *promptitudo* talis eximia, qualis deinde passim observatur. Unde meritò, primò omnium



locò, illud collocamus, quòd *Affectûs Gravidarum* morbi-  
di, generalius, sint res *non valdè frequens*; sed multæ gra-  
vidæ, imò *longè plurimæ*, à veris sanitatis detrimentis im-  
munes vivant: Specialius autem *teneriores* demum, corpo-  
re & animo *sensibiliores*, aut *segniores* atque *desides*, & simul *in-*  
*temperantiores*, affectibus talibus p.n. expositæ demum vivant.

IV.

Quod autem *Affectûs* ipsos, eorumque veram indolem,  
concernit, qui *gravidis* maximè evenire solent, sunt illi oc-  
cupati partim circa *Ventriculum*; partim *hypochondria*; par-  
tim circa *Uterum* ipsum. Obtingunt etiam diversimodè, se-  
cundùm *temporis* rationes; dum alii magis solùm *per initia*,  
alii *in progressu*, alii denique *sub exitum* gestationis, quàm  
maximè sese produnt.

V.

Est ex his, tam *locò* quasi *suprema*, quàm *tempore* quo-  
que inter alias prima, *ventriculi* perversio, imò ipsius *appe-*  
*titûs*. *Fastidium*, inquam, imò insignis *nausea*, *carnium*: quin  
mox etiam *vomitus* post assumptos quoscunque cibos, inpri-  
mis tamen, si non æquè ipsas *carnes*, tamen decocto seu *jure*  
*carnium* quomodocunque imbutos; aut etiam paulò largiùs  
simul ingestos. Solet autem hoc genus pathematis gravidis  
inprimis evenire *primis quatuor aut sex septimanis*: Rarif-  
simis autem exemplis etiam *valdè diu*, nedum per totum ge-  
stationis tempus continuari, quale quid in juvencula quâdam,  
vinosioris inprimis diætæ, meminimus, quæ per *totum gra-*  
*viditatis tempus*, vehementer vomebat, sed tamen aliquantò  
*tardiùs* post assumptos cibos, adeoque non ita copiosâ  
excretionem, sed pluribus solùm *vacuis*, anxiiis tamen & for-  
tibus, conatibus.

VI.

Deinde, *constat* aliis gravidis appetitus tanquam ordina-  
rius; aliis *augefcit* eximiè: aliæ vel perpetuâ, vel multiplici  
*Malaciâ*, & fastidioso ciborum selectu, conspicuæ sunt: Ali-



is accidit planè *Pica*, seu ingens desiderium rerum, vel toto genere alieniorum, vel *temporis*, aut civilibus etiam, rationibus, difficulter impetrandarum.

VII.

Obtingit etiam aliquibus talibus aliud incommodum à ciborum assumptione, ut plenitudinem seu *oppletionem* peculiarem molestam inde experiantur; temporis demum successu, nempe horarum unius vel alterius spatio, demum rursus evanescentem. Evenit autem hoc quàm maximè *ultimis* gestationis mensibus, quando admodum *grandior* uterus, simpliciter quasi angustias insignes infert, adeoque ventriculi distensionem difficultatibus premit. Imò verò, evenit etiam sic satis familiariter, ut *sensibilior* gravidis obtingat ventriculi constitutio, ad cibos crudioris, *flatulentæ*, nimium *fermentescantis*, aut *concoctu difficilis*, conditionis: ita, ut iisdem fœminis, quæ vacuæ, intemperantioris edacitatis circa minùs congrua edulia nullum effatu dignum incommodum sentire solent, si idem gravidæ quoque audeant, nequaquam par obtingat impunitas. Cæterùm, quæ & quantitate & qualitate ciborum temperantiùs utuntur, illis per hæc tempora jam provectoris gestationis, rariùs eveniunt ulla talia incommoda.

IIIX.

Alvi *successus* deficit aliquando gravidis, admodum rariùs tamen *directè* graviditatis ipsâ culpâ; incumbente nempe graviùs *uteri sarcinâ* in ipsum intestinum rectum. Longè familiariùs autem sicciior ipsis evenit alvus è mala consuetudine justò *parcioris potûs*: aut nimix *desidiæ*, quin reliquæ, etiam extra statum imprægnationis, *adsvetæ* tarditatis hujus excretionis. Objicit autem illis non pauca aut levissima incommoda, si vel ab assumptorum vitiosâ constitutione, vel à longiore mala *consuetudine* & *atoniâ vagâ* intestinorum, sive externis aliis causis, improvidarum maximè *refrigerationum*, *flatulentia* ipsis eveniat, & cum hac alvi segnitie concurrat.



IX.

Quando autem illa primi generis, ab *Uteri* ipsius incumbentis pressione dependens, alvi obstipatio, gravidas obsidet, tunc experiuntur communiter simul etiam alterum non leve incommodum *tenesmodis* irritationis intestini recti, ad excretionem omnimodò expediendam. Huic incommodo junguntur non adeò rarò etiam inflationes vesiculares vasorum *hemorrhoidalium*, quas vulgò *Mast-Rörner* & *Eacken* appellant: tum aliâ molestiâ, tum *ardoribus*, imò interdum *ulcerosa* erosione, patientibus molestissimas, & in posterum etiam incommodas consecutiones, machinantes.

X.

Proxima ab his incommodis, est *anhelitûs* major difficultas; rariùs aliter, quàm vel post *cibos* largiùs sumptos, vel *motûs* corporis liberaliores, sese exerens: adeoque vix unquam quasi *continua*, sed communiùs solùm *transitoria*. Dependet autem partim à jam dicta illa *coarctatione*, quam ingens plenitudo, posteriore tempore gestationis, abdomini & præcordiis objicit: partim etiam à modò notata accidentali *flatulenta* angustiarum intensione: partim, in primis illa, quæ à *motu* increbescit, à sanguinis *plenitudine*, in primis in fœminis, quæ sub ipso gestationis tempore, & peculiari tunc temporis *edacitate*, etiam corporis habitu *augescere* observantur. Aliquibus tamen, in primis *staturâ* breviori aut teneriore conspicuis, concitat hanc anhelitûs difficultatem etiam ipsum *pondus* uterinæ sarcinæ, abdomen ita deorsum trahens, adeoque respiratorio motui velut antisacoma aliquod objiciens.

XI.

Supereft in abdomine peculiaris, neque certè levis, molestia, quæ gravidas non adeò rarò corripit, circa *Urinæ emissionem*; ut incommodissimum *sepe* mittendæ *Urinæ* conatum, imò vel planè *stimulum*, experiantur. Evenit ipsis hoc incommodum *ultimis* quàm maximè gestationis septimanis. Aliquibus tamen etiam vel circa *medium* tempus; quando videlicet ipsis uterus plus deorsum incumbit, minùs vividâ con-



contentione tum superiorum ejus ligamentorum, tum ipsius abdominis, circa *Epi- & Hypogastricam* regionem.

XII.

Per *externum* corporis *habitum*, obtingunt gravidis quibusdam tanquam sensibiliores *extenuationes*, ut *macilentiores* fieri appareant; imò etiam viribus *langvidiores*: Aliæ verò hòc ipso tempore *habiliores* fieri videantur, imò verò pingvescere. Ex his observantur priores, si de reliquo nusquam malè ipsis sit, infantes *auctiores* edere; alteræ verò illæ, minores atque *graciliores*: nempe, ubi infanti potius debita abundantior alimonia, otiosè in superfluum materni corporis augmentum impenditur, infanti autem ita nimis parcè suppeditatur.

XIII.

Porro, eveniunt gravidis, inprimis tamen illis, quæ etiam extra hunc statum *maculis* illis fuscis, quales cum pruriginibus acrioribus conjunctas *Lichenes* vocant, vulgus Germanorum *Leber-Flecke* / obsideri consueverunt, similes etiam mali coloris maculæ in facie, & collo: inprimis autem circa ipsam frontem. Aliis autem *palliores*; aliis insoliti *rubores*, quibusdam constantiores, aliquibus volatici, ferè tamen utraque hæc cum aliis *internis* incommodioribus sensationibus conspirantia.

XIV.

Aliquibus obtingunt vasorum *venosorum* in alterutro inprimis *crure*, inflationes stabiles *varicosæ*, seu *nodosæ*, & *crispæ*: imò ipsius non rarò ejus cruris præ altero velut augmentum aliquod, nempe insignior *inflatio* subtumida: aliquibus etiam actu *tumida*, nempe cum *duritiæ* quoque, stagnationis intensioris teste. Aliquibus, inprimis temperie corporis *phlegmatica* dicta, magis conspicuis, evenit tumor etiam actualis *oedematosus*, citra visibiles illas vasorum inflationes. Aliquibus cum illo vasorum infarctu eveniunt etiam *Ecchymomata*, *su-gillationum* instar, braun und blaue Flecke umb solchen Geäder herum: vulgus Germanorum appellat crura gravidarum ita affecta.



fecta, quòd cum foëtus gestatione eveniant, ein Rinds-Bein: & solet hæc mala dispositio, depositò uteri onere, iterum evanescere; quoties autem iterum imprægnantur, iterum etiam pristino more se exerere, quàmvis aliquando etiam post ea tempora, & vacuo iterum utero, incommoda sensim inde percipiant foëminae: imò etiam sub ipso tempore gestationis, ab hujusmodi constitutione dolores varios etiam exquisitos, tam urentes quasi, quàm lancinantes atque spasticos, experiantur. Eveniunt hæc quàm maximè, à medio gestationis tempore ad ultimum, nempe ipsum usque partum: nempe pariter à foëtus uterum gravius in alterutrum latus pelvis, mole suâ *inclinantis*, & vas Iliacum seu Crurale ibidem prementis, pondere.

XV.

Aliquibus dolet etiam vehementer *Coxarum & Lumborum* regio *postremo* maximè gestationis tempore; à ventre acrius antrorsum atque deorsum propendente. Aliis dolet ipse *venter* exterior; unà cum nitidâ non solùm, sed striis etiam transversis distinctâ rubedine: non aliter, ac si abdomen *fissuras* agere minaretur: pariter ab ingente mole uteri, præter mensuram staturæ individui gravidæ, nimium expansi.

XVI.

Præter hæc autem eminentiora pathemata, cùm quædam etiam adhuc occurrant, haud multò minoribus molestiis atque pejoribus consequentiis insistentia, quàm ipsa hæc, & quidem etiam mox inde à primo, conceptionis magis, quàm gestationis, tempore, est aliquid etiam de illis omninò dicendum. Obtingunt nempe ita aliquibus ingravidatis, inprimis autem in plena diæta viventibus, tum etiam constitutione corporis plethorica adfectis, ut, cùm supra nominatis illis internis promptis, imò sæpenumerò spontaneis, *angustiis*, *Capitis Dolores* eveniant plus minùs vehementes, vel *Artuum Lassitudo* operativa seu *gravativa* valdè sensibilis. Imò illis, quæ etiam alioquin *rheumatico-artbritoideis* pathematibus tentari cœperunt, obtingunt aliquando tantæ in his partibus atque locis *Atoniæ*, imò potius *intensiones tonicæ spasticæ, rigide*, ut inde  
para-



*paralytodea* aliquando damna metuantur. Sicut etiam familiarissima ante dictæ *plethoricæ* hujusmodi constitutioni, inpr. *delicatiores* atque *otiosiores* adsvetudinis, tanquam undique familiarissima, est, mox, imò propemodum magis, ab ipso primo gestationis tempore pedum talis summa *Gravitas*, ut *plumbeos* veluti esse familiari loquendi formulâ conquerantur. Causa facilè agnoscitur *oppletiva* illa *tensio*, emanentibus jam *mensibus*: manente verò tantisper *appetitu*, & jam etiam ab antecedente tempore perceptâ *plethorâ*: quæ maximè, quantò magis insignis est, eò extantiora etiam sentiuntur hæc ipsa incommoda.

## XVII.

Antequam autem ultra progrediamur, tanquã è medio loco tam ad *initia*, quàm *finem* respectantes atque prospectantes, faciemus etiam verba de illis Affectionibus, quæ gravidis etiam magis absolutè, quàm talibus, evenire soleant, quibus illæ tanquam simpliciter à *non gravidis* veluti distingui possint. Nempe & multa, & aliquando etiam peculiaris momenti & quasi ponderis, est quæstio, de *signis Graviditatis*: tam in favorabili respectu *honestarum*, in conjugio viventium, foeminarum, quàm in odiosiore, *suspectarum, solutarum*. Ne prolixitate rem magis implicemus, quàm explicemus, nec tamen etiam brevitate obscuri simus, dicemus paucissima verba, sed facilia omninò intellectu, asseverando, quòd simplicis atque nudæ imprægnationis signa legitima, sint utique satis evidentia atque certa: Illius autem, quæ cum aliis incommodis sive jam prægressis, sive etiam concurrentibus, *complicatur*, nusquam simpliciter certa & infallibilia dentur signa: inprimis, si foemina, quæ in quæstionem venit, malitiosè *disimulare*, & ad quæstiones ipsi necessariò proponendas, *fallacem* responsionem reddere, in animum induxerit: quò casu nulla Certitudo, sed nuda probabilitas major aut minor, locum habet, si foemina factis callidè dissimulare intelligat: Cui rei etiam aliquando per nimium apertas atque *directas quæstiones* occasio præberi potest: unde prudenter agendum.

## XVIII. Re-



Rectè *sana* foemina, ab omni *mollitie* aliena, sed *robustioris* potiùs seu firmioris *indolis*, *mobili* ad tolerantiam vitæ rationi vacans, potest omninò etiam *prægnans* fieri, & aliquamdiu concepisse, citra ullum aliud signum aut confectarium, nisi *menstruæ evacuationis* emanentis. Siquidem circumstantia illa *carnium* nausæ, nequaquam ita *universalis* existit, ut illam ubilibet certò requirere, aut super ipsius absentiam, tanquam fundamentum firmitus, aliquid circà hanc quæstionem decernere, integrum esset. Quamvis autem etiam *Emanatio Mensium* simplicissima, cum nulla alia *dysphoriâ* concurrens, non contemnendum locum inter *signa* habere possit; non tuerur tamen hunc locum simpliciter *absolutè*, dum etiam aliunde, & morbidâ omninò ratione, supprimi possunt menses, citra præsentissimam aliquam *dysphoriam*. Unde tantò major est dubitationis circà hanc rem occasio, si etiam verè gravida foemina, emanentibus etiam tunc legitimè Mensibus, vnà plura incommoda persentiscit, à *plethorica* constitutione, & vitâ insuper nimis *deside*, vel etiam contra *inordinatis* & præposteris, repentinis & *intemperantibus* corporis motibus. Quandoquidem tales affectûs, qui tunc emanationem Mensium itipant, reverà non gravidis simpliciter, sed *emanationi mensium* generalius, respondentes, totam rem in impeditum conjiciunt.

XIX.

Proximum locum, inter reliquas etiam circumstantias fidelius elucidatas, occupat *Nausea* illa insignis *Carnium*, & inprimis quidem ipsius etiam *nidoris* earundem adhuc fervidarum. Cui plurimum auctoritatis adhuc foeneratur illud, si foemina ita *nauseosa*, reliquis corporis viribus sibi ita satis constare sentiatur, nequè pro proportionè aliter, inprimis circà *ventriculum* atque *primas vias* deterius habere: imò planè, alios cibos, & satis commodè, cum appetitu nihil eximiè languente, assumere, & assumptos etiam cum nullâ, aut effatu nihil æquè digna, molestiâ tolerare.



Enimverò, si hæ circumstantiæ in dictis exquisitioribus terminis conspirent, minus jam est propemodum dubii; minimè tamen certa res & simpliciter *indubia*. *Tertia* autem in ordine, & cum præcedentibus jam multam dignitatem pro suffragio formando obtinens, est *Ventris* foeminæ, in hanc quæstionem adductæ, *Intumescencia* quidem quàm maximè *globosa*, non inæqualis, & inprimis per umbilici regionem non *complanata*, sed tanquam *summitatem* totius hemisphærii ibi efformans: *Durities* autem propemodum *æqualis*, licet versus *Iliæ* aliquantò magis remissa, inprimis si *flatûs* absint: dum alii *morbidi tumores* ventris, diversam convexitatis rationem formare consueverunt. Certè, quando hæc *tumoris ventris* constitutio hanc *dimensionem*, etiam *augescendo*, *constanter* & *æqualiter* servat & prosequitur, & incrementa etiam quàm maximè *placida* atque *successiva* capeffit, *pedibus* insuper à tumore *oedematoso* liberis, nedum reliqua sensibili *euphoriam* conspirante, crescit ex harum rerum consensu dignitas testimonii. Quandoquidem illud nimio rariùs est, ut verus *morbidus* tumor, directè ab *abdomine* incipiat, & non à *pedibus* potius: ubi etiam, si vel maximè quæstio instituaturs concurrente jam etiam crurum tumore, locum sibi omninò vendicat observatio *proportionis*: quæ, si in ipsis quoque cruribus *ingentem* tumorem offert, in impedito reverà est iudicium, cum tale quid etiam ipsis *gravidis* quidem aliquando eveniat, sed nullò non solum, verum etiam in se *alieno* à justæ ingravitationis indole, argumento.

XXI.

Hæc ita per *priores*, *quinque* circiter, *Menses*: quando verò *vigesima septimana* præteriit, tunc ipsis quidem foeminis, circa imprægnationis sui veritatem curiosis aut sollicitis, vix potest deesse luculentius testimonium, quando utique sensum *Motûs foetûs* in utero percipiunt. Qui, quamvis interdum satis *obscurus* existat, non potest tamen foeminas, qualiscunque discretionis compotes, planè subterfugere: antè

C

omnia,



omnia, si ipsis etiam suppeditentur ab aliis discrimina hujus Motûs, à quibuslibet *borborygmis* & *flatulentis* sufurris aut volutionibus in ipsis intestinis. Sicut etiam locus *Motûs foetûs* altius sub *bypogastrio*, à *flatulentis* cursationibus plurimum differt. Quæ verò, dissimulandæ gestationis ergò, etiam hujusmodi sensationem pernegant, & reliqua quoque signa confusa offerunt, illis præter suspicionem circumspectam nihil certiùs potest imputari. Aliena certè manus, nisi simpliciter fors fortuita quasi cœptum secundet, non potest hîc rem certiùs deprehendere; quòd enim aliquando, maximè quàm rectissimè constitutis omnibus circumstantiis, sanâ, vegetâ, & alacri, matre æquè atque prole, jam benè *calida* manus, *tepido* solùm ventri, jam *frigida* exquisitiùs, *calenti* admota, infantis motum aliquando post sese trahat, id non est adeo perpetuum, ut inde certus par effectus semper expectari possit: aut ita ex defectu ejus, ad negandam præsentiam foetûs colligi. Quando autem omninò occasio obtingit, motûs illos tunc, quando maximè fiunt, deprehendendi, tunc potest utique *perita* manus de re præsentè veriore sensum percipere, &, an talis motus foetui verè tribuendus sit, distinguere.

## XXII.

*Suspectas* personas expedit omninò quoquo modo eò adigere, ut honestæ & peritæ foeminæ ocularis inspectio ventris earum obtingat; dum aliàs tam subligaculis atque stricturis, quàm incessu etiam magis affectato, occulere hoc augmentum non magis laborant, quàm passim etiam satis habiles existunt. Tumor *Ventris*, sine *pedum* tumore, *euphoria* reliqua qualiscunque, *appetitus* etiam, inprimis in progressu non poenitendus, sicut per initia alienior & *nauseosus*, præbent ad minimum optimè fundatas *suspiciones*, pro personis quoquo modo *dubiis*, satis studiosè observandis atque commonendis.

## XXIII.

De *Urina* meretur omninò aliquid dici. Cùm abusus  
Uro-



*Uromantie* adeò sit notorius, ut etiam honestiùs haberi mereatur, ubi morum dominium non obstat, illam universam rude donare, ita est certè etiam iudicium ex Urina circa hoc præsens negotium fallacissimum, inprimis si juxtà triviales traditiones instituatur. Illud, quod ego Præses aliquoties verum deprehendi, est, quòd, *sana* de reliquo, foeminæ prægnantis Urina, adeoque & ipsa de reliquo *colore & limpida* claritate sano statui respondens, si claro loco scitè versus subobscurum locum aut angulum spectetur, eandem per sui limpiditatem faciem exhibeat, qualis per radios Solis, in obscurius conclave incidentes, subtilissimi pulveris internantis visitur, & vulgò appellatione *der Sonnen-Sträublein* notatur. Hanc constitutionem in Urinâ *sanarum gravidarum*, *sana* atque *limpida*, multoties conspexi. Licèt autem gravidarum Urina omninò sit talis; habeo tamen affatim exemplorum, quòd non *reciprocè*, quælibet urina hoc phænomenon offerens, etiam certò sit gravidarum, sed etiam aliunde *Mensum obstructione* laborantium. Possem quidem differentiam illam allegare, quòd hæc quasi subtilissimè *pulverulenta* apparitio, in *verè gravidarum* Urina, visa mihi sit multò *subtilior*; in alterâ verò, simpliciore *Mensum suppressione* adfectarum, *crassior*: Sed cùm in talibus rebus iudicium ex oculari inspectione, pro ingeniorum varietate mirè variet, nec etiam ex hac circumstantia aliquid *certi* hinc colligere liceat, nolim cuiquam aliquid speculandi auctor esse. Ego aspernor talia.

#### XXIV.

Præstat itaque circa dijudicationem imprægnationis, sano ad sensum reliquo corpore, inprimis insistere *Mensum* habitui, ad ipsam hanc constitutionem reliquæ sanitatis, & *tumoris abdominis* proportioni, tam in se exactiùs *globosæ*, quàm iterum in respectu ad reliquam etiam *sanitatem*, aut simul etiam ad concurrentem unâ *pedum* tumorem: tandem etiam *appetitûs* aut *nausææ* rationi, tum ad *diversos* cibos, tum ad *diversum tempus & æqualitatem* magis continuam, aut



plurimum variantem. Maximè omnium autem *motui fœtus* post medium gestationis tempus, ubi ejus quomodocunque sinceriora & confessa, aut convicta assequi licet indicia. Alias, quas variæ antiquæ traditiones narrant; probationes v.g. per *Suffumigia Gummatum* secundum illas fabulas, dum utero applicantur, ad gustum pervenientium; sicuti etiam capiti imponendas ejusmodi Species, & observandas hinc peculiare mutationes in gravidâ: partim merè *fabulosa* sunt, partim, in varia subjectorum *sensibilitate*, ita *incerta*, ut absurdum esset vel affirmativè, ubi se ita exererent; vel negativè, ubi deessent, ullum judicium ipsis superstruere. Verbo: & *peritiâ* hîc opus, & insuper *prudentiâ*, tam ad comparandum, quàm audaciùs decernendum.

### XXV.

Ut autem etiam ad illos affectûs progrediamur, qui jam ampliùs ipsi *Utero* gravidarum, propius negotium facessunt, sunt tales antè omnia peculiaris veluti Sensibilitas, ad minimum secundum communem loquendi modulum, intuitu *menstrualis sanguinis*, sive potius evacuationis ejusdem; dum foeminae gravidæ, admodum *plethoricæ* constitutionis, & alias etiam evacuationes has liberaliùs experiri solitæ, primis quàm maximè imprægnationis mensibus, tanquam impatientiore hujus farcinæ utero, & ad elisionem ejus valdè prompto, *Abortui* valdè expositæ observantur. Unde reverà ad *Abortum*, è tacitis quasi, aut sanè *levissimis*, conspicuis causis, non promptiores sunt foeminae, talis nempe constitutionis occasione, nisi *primis* tribus aut quatuor mensibus.

### XXVI.

Planè peculiaris autem est mala fortuna illarum, quæ semel *abortum*, & maximè hujusmodi adhuc parùm maturum, expertæ, posthac, & inprimis proximè, iterum concipiunt: siquidem tales, communissimis exemplis, denuò admittendo abortui, mirum quàm facilè expositæ, imò modò non destinatæ observantur: & maximè quidem circâ illud ipsum tempus, quò antecedentem abortum perpessæ fuerunt:



runt: illas ipsas, inquam, gestationis septimanas: sicut ejus rei exemplum, in Illustrissima Patiente observatum, etiam *Pathologiae* suæ inferuit D. D. Præses, quinquies deinceps, *duodecima* semper septimana, denuò facti abortûs.

XXVII.

Ceterùm adeò certè hæc constitutio *nimiæ plethoræ* periculosa est, inprimis *animi* etiam sensibilibioris, foeminis, ut, nisi ipsis, vel repetitis, ventilationibus succurratur, non solum aliis variis incommodis sanitatis suæ expositæ vivant, sed etiam *abortui*, vel jam grandioris foetus, ob leviores etiam occasiones ulteriores, tantò magis obnoxia evadant. Sicut autem *plethora* tanquam magis *directè*, non tam alio tempore, quàm *primis* maximè Mensibus, *Abortûs* periculum inducit: ita introducit hoc idem etiam *quolibet* tempore vehemens maximè *Terror*: tum etiam *Iracundia*; sed hæc etiam postrema, inprimis non certius aut citius, quàm sub concurrente inprimis *plethorâ*. *Terror* autem etiam omninò citrà illam, certè tamen etiam tantò facilius cum illâ.

XXVIII.

Quamlibet autem rarius, evenit tamen omninò etiam, ut gravidis *plethoricis*, & alioquin mensium fluxum *largius* experiri assuetis, *sanguis ex utero* fluat, *duplici* indecente modo. Uno quidem, dum *mensium* more per priores adhuc gestationis menses procedere pergit; unde etiam non rarissimè calculum mulierum falsò institui contingit, ut dum illum simpliciter à mensium *emansione* jordiuntur, non autem ad *motum foetus* in utero attendunt, pauciores justò menses gestationis deinde numerent. Altera verò intempestiva hujusmodi eruptio sanguinis contingit jam post aliquot menses, imò post medium gestationis tempus, licet rarioribus casibus. Sicut ejusmodi exemplum mihi Præsidi non ita dudum oblatum est in honestâ foeminâ, quæ à medio tempore gestationis usque ad partum, largissimo, & inprimis prope modum continuo, sanguinis ejusmodi profluvio affecta, nihilominus & attigit justum partûs tempus, & feliciter enixa est.



Habent interim *utraque* omninò illud periculi, nimio magis autem tales, quæ non solum *tardius*, sed etiam nullo *stato* tempore, fluxum sanguinis ex utero, sub gestationis tempore, experiuntur, ut *abortus* periculo propiores sint: aut etiam à *medicationibus*, *adstrictioni* simplicius dicatis, nec illud periculum effugiant, & interim aliis adhuc nihilo minoribus sanitatis suæ turbationibus, etiam ultrà partus tempora se protendentibus, ita subjiciantur: nisi nempe à *ventilationibus* sanguinis aliis & initium factum sit, & factò hoc etiam reliquum negotii, quàm minimo *adstringentium* interventu, absolvatur.

XXX.

Altera, incommoda tamen magis, quàm verè *νοσηρός*, uteri molestia, quam à gestando foetu per sentiscit, est *Dolor* interdum temporarius, inò verò brevissimi ambitus, ipsi eveniens à *calcitracione* foetus. Hoc autem sicuti non evenit, nisi *postremis* ad summum duobus Mensibus: ita non alio nomine etiam ejus mentio fieri meretur, nisi illò maximè unò, quòd reverà ab hoc ipso etiam incommodo, non timenda sit gravioris periculi facilis consecutio, minimum omnium autem *Abortus*; & hoc ad *Practicam* considerationem; ad *Theoriam* autem ad illustrationem, pro sequiorum morum præfigurationibus, quasi foetus ipse ad *partum* sui nisibus fortioribus calcitratoriis concurret (non solum parturientium, & quàm maximè discretarum, unanimi confessione, hîc in Negativam consentiente; sed etiam inter eos, qui in Praxi vivunt, & *difficillimè*, atque *tardè* parientibus adsistunt, satis gnaris, quàm familiariter, inter reliquos partus dolores, sed moventes solum, non promoventes, necessaria sit quæstio illa, an infantis *motum* adhuc percipiant? & quàm rarum atque debilem familiariter hunc percipiant: ut de *Abortibus*, ante tempora *motus foetus*, nihil dicamus); cùm non ita rarissima sint ejusmodi exempla *Calcitracionis*, de quâ loquimur, foetuum eoque importunæ, ut matribus etiam *Lipothymia* impend-

ant,



ant, citra ullum tamen *Abortus* subsecuti exemplum: Familiarissima verò adeò sensibilis huiusmodi *Calcitrationis* ferocia, ut matribus non solum anxiam querelam, sed passim tenerioribus etiam *lacrymas*, excutiat.

XXXI.

Aliud autem, & certè minimè bonum, *Accidens*, quod gravidis *aliquando* evenit, est in locum *Mensium* subsistentium succedens *Fluor albus*. Sicut autem non sine solida causa vocem, *aliquando*, adjecimus: ita valet certè, pro adhuc strictiore explicatione huius limitationis, hoc adjicere, quòd hæc res reverà longè quàm rarissimè obtingat. Et quidem minimè omnium tangat foeminas reliquâ bonâ sanitate conspicuas; deinde, quarum mariti & continentiores, & maximè omnium fideles sunt: longè propiùs autem, quæ non solum hòc tempore cum aliis, hoc malo adfectis, familiarius vivunt; sed etiam certissimè omnium tales, quæ etiam extrà statum imprægnationis, huiusmodi incommodo affectæ jam sunt.

XXXII.

Quamvis autem neque *menstrui* sanguinis, nec omninò ipsius etiam *Fluoris albi* fontem unicum, constituamus simpliciter strictè sic dictum *Uterum*; sed partim quidem ipsi, partim autem ipsius intimioris vaginæ uterinæ tam vasculosæ, quàm glandulosæ substantiæ, hos ipsos exitus facillè concedamus: Quia tamen & hæc quoque partes, latiori complexui *Uteri* meritò accensentur: & insuper talis *angustia* acceptionis, in nostro maximè negotio, ne minimum usum habet: proptereà nihil dubitamus, hæc etiam *Gravidarum* *Accidentia* ad *Uterum*, latiore sensu, ita referre. Imo verò eòdem etiam nomine referimus ad *uterum* ipsum *Negotium Partus*. Non utique eà opinione, quasi negotium exclusionis foetus *extrusioni Uteri automatica*, ad exemplar vulgaris machinæ affatoriæ, wie ein Bratenwender/der sich nicht überspannen lässt/imputemus, aut formulas illas nostras faciamus *Uterus* mole, pondere, calcitratione foetus, *irritatur*, *Uterus*



*contrahit se, Uterus exprimit ac elidit contentum foetum : utpote quos motus & quas pressiones elisorias & ab alio Moven- te perpetrari , & alias etiam suscipiendi hujus Actus causas agnoscere, quàm vel nimiam distensionem, vel nimiam one- rationem, vel quamcunque aliam gestationis molestiam, vel denique foetus calcitrantis molestias &c. tamen, cum utique pariendi negotium non solum propriè contentum ejus tempo- ris uterinum concernat; sed etiam utique Uteri stricturâ ab- solvi debeat, referimus meritò hoc ipsum etiam ad Uterum. Quò itaque intuitu etiam aliqua non tam de ipso partu, quàm quæ ad ipsum respiciunt, imò strictissimè, legitimam ejus in- dolem non sequuntur, ut præsentè loco digna, proferemus.*

XXXIII.

Equidem sentimus omninò ita etiam ex animi nostri sen- tentiâ potius, quàm ut solum aliis assentiamur, quòd super- fluxæ speculationes in Medica maximè Praxi, ac ad *Artis exer- citium*, nullum, aut minimum, *usum* habentes, minimè minu- tim excutere, & tanquam nodum in scirpo quærere, consultum haberi debeat. Interim cum illud, quod reverà valdè rarò fit, nequaquam simpliciter cum eo, quod quotidie fit, confundi, absolutè indifferens haberi, aut simpliciter paribus causis adsi- gnari, salvâ sanâ ratione verè possit, aut ab illo, bonò jure, sim- pliciter pares effectus expectari, ut ab ordinaria, nisi peculiares circumstantiæ declinationem inferant, constante usitatâ me- thodò: non certè injuriâ hinc hæ etiam *pariendi* diversita- tes peculiares, planè extra omnem considerationem facti ipsius seponendæ nobis videntur: Quamvis causarum *proximarum* scrùtinium, ne subinde in inanes, aut sterilissimas certè specu- lationes, fiat prolapsus, omittere passim, omninò consultiùs ducamus.

XXXIV.

Sicut enim *duæ* maximè sunt series circumstantiarum, quæ veram considerationem & æstimationem *Partus*, à falsa & imaginaria, secludunt, una *negativarum*, altera *positiva- rum*: Ita non frustrà erit utramque breviter commemorare.



NON efficiunt, aut ullo modo, tanquam simpliciùs atque directiùs, provocant Partum, neque 1) *Infarctus* atque *Distensio Uteri*, tanquam in se & simpliciter; exemplo *Molarum* variæ magnitudinis, quæ uterum ad excussionem nihil usquam dignum effatu sollicitant. 2) Neque Magnitudo *insignis*, & *ingens* distensio Uteri; exemplo non solum p. n., tum similium *Molarum*, stupendæ aliquando molis, solarum; aut unà *cum fœtû* gestatarum; aut magna quantitas *serosæ* colluviei, cum fœtu unà gestata, & in partu prorumpens; tum s. n. unius infantis præ altero notabilis *magnitudo*, & iterum ex adverso aliorum etiam *exiguitas* solito major, legitimum Partûs tempus nihil propter eâ differens: quin etiam *Geminorum*, imò *Trigeminorum*, non alia, quàm communis usitati temporis ambitu circumscripta Nativitas. 3) Neque *Calcitratio* fœtûs; cum etiam sæpè, velut intoleranda talis, non solum partum non perficiat, aut verum sensum dolorum ad partum ullo modo æmuletur; sed etiam sub genuino ipso partu ordinariè minimè omnium sentiatur: 4) nec ullus etiam alius verè *activus Connisus* ipsius fœtûs, ut partum vel primariò *provocaret*, vel plurimùm & eximiè *promoveret*: cum non solum *Abortûs* conceptuum, ante tempus *motûs*, adeoque *nisûs* eorundem, præcipuè talis, qualis pro legitimo reputaretur, passim in lucem edantur; sed etiam omni vivido motu destitutæ ante dictæ *molæ*, quin etiam *fœtûs mortui*, variæ ætatis atque magnitudinis.

### XXXV.

*Secundæ* Classis positivæ Partûs circumstantiæ sunt ante omnia, solennissima *Mensura temporis, quadraginta Septimanarum*, à quarum *medio, viginti septimanis*, ipse maximè *Motus Embryonis* sese exerere incipit. Deinde *specialissimum* tempus, feriò expectandi huiusmodi conatûs & actûs; illud nempe, quò aliàs foeminæ illi gravidæ *menstrua* evacuatio, secundum *Lunæ phasin*, evenire constantiùs consuevit: & hæc s. n. At etiam p. n., matris insignes *terrores*, aut enormes *iracundæ* animi exasperationes, sine ullo exquisito respectu ad



qualemunque habitum ipsius *fœtus*, *magnus* aut *parvus*, *maturus* partui, aut *immaturus*, ille existat. Ubi etiam adhuc, ad *negativas* etiam circumstantias, referri potest habitus *fœtus* aliquando *debilioris*, qui sub tali sui constitutione minimè apparet promoveri posse sui exclusionem: id quod tamen non ita rarissimè fieri, in causa, inquam, etiam *præmaturæ exclusionis* esse aliquando etiam *debilitatem* *fœtus*, notorium est: nisi quòd in hoc ipso quoque genere familiariùs expectari soleat ipse omninò eventus *mortis* *fœtus* ita debilis, & tunc demum *mortui* excussio institui; Sicut etiam huc omninò trahenda est, jam paulò superiùs à nobis laudata illa, *stati temporis reversio Abortus*, in primis valdè adhuc *junioris*, secundùm tempus semel, maximè verò iterum, factæ excussionis similis.

XXXVI.

Quæstio propemodum, ut habet usitata loquendi formula, quolibet sensu *vexata*: de *vero Terminò Partus humani*, licèt prolixitatem nobis ullam imperare non debeat, quia tamen utique ad præsentem locum pertinet, absolvemus illam, quantum fieri potest, brevissimè. Equidem Juris in primis incerti conatus, præcipuè propter possessiones à veris hæredibus non abalienandas, potiùs, quàm opificum manuariorum præpostera Privilegia, & Consistorialium Constitutionum respectus, videntur utique necessitatem aliquam ejusmodi Decisionis, bono jure, flagitare: sed malâ propemodum fortunâ illam expectant à Medicorum choro, hodierno dico, è solis propemodum opinionum diffidiis veluti primariam suam gloriam quærente, & laudem judicii, sive potiùs speculationum liberarum, in ipsa judicandi licentiâ ponente. Poterit autem puto consultiùs odium malè formatarum illationum atq; conclusionum, quod ferè etiam Causidici Responsis Medicis hinc inde, non sine speciosis probationibus, conciliant, evitari, si solùm ipsa *fundamenta* judicandi vera atque solida in medium producantur, & cujuslibet dexteritati deinde collectio sive Conclusio ipsa relinquatur.

XXXVII.

Sunt autem hæ circumstantiæ maximè sequentes: I. *Universalis*,



*salis*, per *millenarios* numeranda, & abundè nota, adeoque contrariis casibus, tanquam *peculiaribus* observationibus, non nisi ut *singularissimis*, opponenda, una sola constantissima Experientia, est, quòd foeminis gravidis, nullis, & maximè propemodum gravioribus, p. n. incommodis, jam vexatis, partus *legitimus*, & hinc etiam omnibus modis *felicior*, actu, & puerperii successu, eveniat *quadragessimæ septimanæ* ambitu. II. Hæc ipsa, toti sexui foeminino communis, & non nisi paucis, in comparatione, casibus subjectorum, vel *plethorâ*, vel *dieta* minùs rectè constitutorum, nedum apertioribus p. n. *accidentibus* affectorum, alicubi varians, Experientia testatur, quòd etiam *dimidio* hujus temporis spatio, nempe *vigesima Septimanâ* motus *fætûs* in utero se exerere soleat; Unde etiam, si de *initio* imprægnationis dubium aliquod occurrat, confidentissimè à primis *sensationibus* discretis hisce *motus fætûs* in utero computus instituitur ad residuum temporis gestandi, à peritis maximè harum rerum mulieribus, cum minimo fallaciæ periculo. III. Eadem Experientia testatur, quòd foetus (reverà satis *rarioribus* exemplis, etiam adhuc inter generaliore raritatem totius facti,) *septimo* Mense in lucem editus, visibiliter differat, non solùm reliquâ spectabili *teneritudine*, sed aliquarum etiam partium, v. gr. *unguium* manifesta propemodum imperfectione. IV. Ut in omnibus rebus nudi *facti*, quarum sinceras *rationes* assequi non datur, tantò firmiùs insistendum est ipsi Veritati facti, & inde maximo jure subsumendum, quòd, quicquid universaliter non aliter *fit*, illud etiam verè probabiliter aliter fieri *posse* minimè statui debeat: & alienissima prorsus ibi est talis velut argumentatio: *non intelligo, quid obstare possit*, Ergò *re ipsa nihil obstare potest*, quin talis res non solùm ita, ut ordinariè fit, sed etiam variis modis aliter, fieri possit. Ita certè, secundùm hanc talem considerationem, firmissimum utique est, & citatâ jam illa universali Experientiâ notissimum, quòd *sanarum mulierum* partus, *octavo* Mense, ita sit *rarissimus*, ut, donec prorsus indubia exem-



pla proferantur, nemo usquam bono jure adstringi possit, ut credat, in præsentē aliquo subiecto talem evenisse. Ubi nempe iterum, ejusdem dignitatis cum ante dicto irritō argumento à priori, est illud alterum à posteriori, nempe *rationes*, quas *antiqui* adduxerunt, quamobrem partus octimestris vix aut nunquam fiat vitalis, vividus, vegetus, breviter: sanus & legitimus, non videntur ullum *demonstrativum*, & cui tanquam luculento subscribere necesse sit, *fundamentum* habere. Ergo, quia ipsi *rationem* malè assequuntur, *factum ipsum non potest esse verum*. V. Ubi verò ipsa utique accidentia externa, sive *sanitatem* corporis labefactantia in matre aut foetu, sive *motus* ipsos in corpore gravissimè perturbantia, concurrerint, tunc demum *p. n.* evenire posse, nullum est dubium; plerosque etiam, qui eveniunt hujusmodi casus, ita maximè evenire, credibile est. Unde certè VI. *sanâ* matre, & exquisitè integro atque plenè *sano*, & numeris suis absoluto *foetu*, *insignes mutationes temporis Partus*, anticipando contingere, ex omnibus allegatis *universalis constantissimæ Experientie*, imò verò *indolis humanæ*, conditionibus, ita parum probabile est, ut, si quæstio aliqua controversa certitudinem urgeat, minimè injustum sit, prius concurrentes quas-cunque circumstantias exquisitè excutere.

### XXXIX.

Facimus progressum ulteriorem, ad alium adhuc eventum, gravidis foeminis satis familiariter obvenientem, qui, licet neque ipsum *corpus*, aut *uterum* gravidæ concernat, tamen *in utero* ejus evenit, & aliqua utique ipsius concurrentis velut energiâ nititur. Loqui aggredimur de NÆVIS MATERNIS; vitiis, inquam, *corporis & animi*, quæ infantibus, adhuc *in utero* materno detentis, eveniunt à *Matris* gravidæ *imaginatione* falsâ, & simpliciter *æstimatoriâ*. De harum quidem, uti vulgò vocantur, *Impressionum* proximo *fiendi modo* verba prolixè facere, nec instituti nostri est, neque *Medicæ* etiam propriè considerationis: qui autem, ut *Philosophi*, illam expendere, aut potius statim explicare, conantur, optan-



optandum certè est, ut sint *Philosophi*; si nullam aliam ob rem, tamen propterea, ut verè *distingvere* meminerint inter *Actiones mentis* simplices, sive *rationis ratiocinantis* simpliciter: & vicissim *physicos* quoscunque contactûs aut *actûs*, ne ipsos etiam *sensorios*, quâ *tales*, excludendo. Et applicent deinde illa ad præsens negotium; ubi non *visus* cujuscunque rei, non *tactus*, non *actualis læsio*, non *doloris* sensus quâ *talis*, non *detrimentum* corpori actu incussum, non *fames* simpliciter, non *ingurgitatio* simpliciter, quicquam in infantem, ut vulgò loquuntur, *imprimunt*: sed unicè *mentis fictio*: aliquando etiam *absoluta*, rei, quæ neque corporaliter *existit*, sed ipsa quoque *figitur*, nempe illo tempore: aliquando etiam *respectiva*, de re quidem verè existente, imò præsentè; sed vel falsò, vel in cassum & absque ullo usu aut effectu cum *affectu* peculiari *æstimatâ*, aliter, quàm vel est, vel meretur. Illud autem, quod magis ad *corporalem* fiendi successum pertinet, complectitur *duas* præcipuas circumstantias. *Primò*, quòd *corporalium* insignium *Navorum* efformatio, longè sæpissimè involvat, non solum posthac conspiciendæ perversæ *texturæ*, peculiarem illam, de puncto ad punctum complicationem *structoriam*; sed etiam *pristinæ*, quæ illo tempore jam certò præstò & penitus formata *fuit*, etiam præcedentem *resolutionem*: ut nempe ita demum in aliud schema transformari possit. *Secundò* peculiare planè illud tempus, quod quàm maximè hanc modò commendatam considerationem propriè infert, & necessariam reddit. Est autem *Tempus*, inquam, inducendis *Navis* maternis quàm maximè idoneum, illud, quod à medio gestationis tempore ad ipsum partum procedit: adeò, ut etiam minimè summè rara sint exempla, etiam non ita multis *diebus* ante partum secutum, demum coortorum hujusmodi conformationis vitiorum: Quæ nempè res universa non tam confirmat, quàm infert potius directè, imò ingerit omninò id, quod modò diximus, & animadvertere monuimus, quòd in negotio *Navorum*, non minùs respicienda veniat operosa & sollicita *dissolutio* jam factæ prioris justæ,



quàm *transmutatio*, nempe translatio in *novam* configurationem. Est autem etiam consideratione minimè indigna, quamlibet ad penitiorem causarum investigationem specialissimam pariter certè insufficiens, circumstantia illa *Nævorum* mater-  
norum, i. e. alienæ texturæ solidæ nova iterum, adeoque *repetita dissolutio*, & in *melio-rem* atque convenientem *itera-  
ta* coordinatio, quæ in magis superficialibus, quamvis proli-  
xis etiam, *nævis*, v. gr. *macularum ab Ignis, aut sanguinis re-  
pentino terrore*, *Blut-und Feuer-Mahl*; quin etiam aliquan-  
tò minorum protuberantium, *fructibus horæis, muri, can-  
cro, ranæ*, &c. assimilatorum: Qualium, inquam, *Dissolutio*,  
etiam simpliciter per applicationem recentis *sanguinis lochia-  
lis* passim iterum obtinetur, tum de ipsa propria Matre, sta-  
tim post ipsum partum: tum etiam de alienis Puerperis; mo-  
dò præcipuè subjectum, nævo tali affectum, adhuc sit ætate te-  
neriore, aut ad summum à pubertate adhuc longius distans:  
quamvis neque hæc adhuc periodus, in subjectis maximè  
*sensibilioris* indolis, non ita absolutè omnem spem excludat,  
quin etiam illo adhuc tempore talis effectus, aut si mavis even-  
tus, locum habere possit. Quæ certè *struendi*, & iterum *de-  
struendi*, vicissitudines, & aliter denuò *conformandi* energia,  
prudentem pensitationem meretur.

XXXIX.

Cùm autem tam de *legitimi partûs* Tempore, quàm de  
*Abortu*, quod satis esse possit, dixerimus, superest, ut pauca  
adhuc adjiciamus de *Habitu ad Abortum*, adeoque non *inter-  
pellandum* solum legitimum gestationis tempus; verum etiam  
*actum* illum vegetum, imò violentum quasi *connisum elisori-  
um*, ita extra omne tempus, suscipiendum. Notandus hîc i-  
terum utique est generalis ille habitus totius *Sexûs*, fœmina-  
rum, inquam, *sanarum & vegetarum*, comparatus erga indivi-  
duales *accidentales* depravationes *indolis delicatæ*, & *animi*  
maximè perturbationibus multiplicibus obnoxia. Secundum  
priorem illam, confirmat generalis experientia, quòd fœmi-  
na *sana* atque *valida*, multum profectò etiam tolerare possit,  
citra



citra hujusmodi periculosum gestationis suæ eventum, imò verum detrimentum. Ubi quidem sufficere poterit tum *rusticas & mercenarias*, tum *militares & mendicantes* patriâ pulsas, tanquam immenso numero, testium loco nominare: quamvis etiam ne *lautioris* conditionis multarum foeminarum, *sanarum & æquioris animi* exempla desint, quæ etiam varias molestias & vexationes, modò *animus* non graviter percellatur, sine gestationis damno ferunt.

XL.

Ubi iterum iterumque summo jure attendenda venit omninò hæc ipsa ita allegata circumstantia verissima, quòd sæpissimè insignes etiam *corporeæ* perturbationes, *gravidis* tamen vix quicquam periculi facestant; variæ, inquam, *ægritudines*, inprimis *chronicæ*, quamlibet etiam cum *concussionibus* corporis, imò in specie *abdominis*, vehementibus conjunctæ: adeò, ut etiam *vomitûs* vehementes non solum *spontanei*, sed & ipsa aliquando *arte* inauspicatâ provocati, *hypercatharses*, imò (annotante etiam Celeberrimo Wedelio) *Dysentericæ*, sine graviore totius gestationis damno, passim satis commodè decedant. Sæpè autem utique tantò magis, si nimia illa commotio non tam simpliciter à *medicamento* violentiâ ortum ducat, quàm à spontaneo magis *Naturæ* individui *obsequio*, *saburrâ* aliqua insigni actu prægravatæ: quibus casibus, nec *incrementi* justî foetus, nec *gestationis* etiam usque ad justum terminum *successus*, & usque ad decentem terminum *constantia*, insigne ita detrimentum capit.

XLI.

Quæ verò admodum *sensibiles* existunt, his afferunt positivum damnum; conjiciunt, inquam, in eventum *abortûs* etiam singula talia; *Vomitiones* vehementes, seu potius *Conatûs* vomendi *enormes*; *dejiciendi terminosi*, *spastici*, *tenesmodes* conatûs: Unde etiam *clysteres* stimulantés aliquando damno occasionem præbent: *Fluxus* autem *alvini*, *longi*, & *lienteriodes*, possunt etiam, *nutrimentum* debitum foetui subtra-



trahendo, hujus *vivacitati*, & ita *per indirectum*, *retentioni* ejus, nocere.

XLII.

Ubi nempè, licèt meritò primum respectum habeamus ad affectûs, foeminam magis *directè* contingentes, & per ipsam *fœtui* præjudicium machinantes; Est tamen etiam utique *consideranda*, *reciproca* illa *habitus foetus ad Matrem* gestantem. Ubi nempè *fœtus* in ipso Utero mala dispositio, præbet utique occasionem malis successibus ipsius gestationis, maximè verò ipsi *abortui*. Quando, inquam, vel valdè *debilis* est fœtus, quo casu etiam leviores aliàs futuræ ad provocandum *abortum* reliquæ occasiones, multum ponderis assequuntur: Si verò planè *emori* fœtum contingat, tunc utique non solum ut res t. g. p. n. retineri non debet; sed etiam, ut *cadaver*, *putredini* obnoxium, retineri ne quidem amplius potest.

XLIII.

Sicut autem hujusmodi hucusque enarratæ gravidarum variæ periclitationes, *corpore* & *animo*, antè omnia tamen *animo*, *sensibilibus* maximè, eveniunt: ita mentio meritò facienda venit, *duarum* adhuc circumstantiarum, quarum altera *directè* & simpliciter magis ad *animum* respicit, altera ad minimum verosimiliter, à *tacitâ illa notitia*, *sensu*, seu discreta *perceptione ἀφαιρέσει*, pendere, agnosci potest. Prior illa est, quod foeminæ aliquando observentur, (qualia exempla ipse Respondens annotavi) sub gestatione, in primis autem *posterioribus* Mensibus, præter reliquam suam usitatam indolem aliæ *impatientiores*, aliæ ad *terrorem*, *metum*, *mœrorem* promptiores fieri: quarum rerum etiam *morales* causæ, *speculanda* magis magisque *persitationis*, & *æstimationis* qualiumcunque molestiarum aut periclitationum, satis plausibiles colligi possunt. Alterum autem est, quod non ita paucis foeminis evenire notatur, ut nempè, si aliquot proles ejusdem sexûs deinceps gestaverint; quantumlibet etiam non ita brevissimis intervallis, si deinde *diversi sexûs* prolem concipiant, mul-



multis modis incommodiùs, aut ad minimum sensibiliùs aliter, quàm à prioribus alterius sexûs prolibus, habere sentiantur.

XLIV.

Supereſt, ut brevioribus verbis attingamus traditionem illam uſitatam de *Signis diverſi Sexûs*, qualis eo tempore geſtetur? De his quidquam *certioris* ſtatui poſſe, reverà fructrà aſſereretur. *Floridior* enim *color* ſub *maſculi*, *pallidior* ſub *foemelle*, geſtatione; *alacrior* etiam animus illic, hîc *torpidior*, in prægnante, adeò *equivoca* ſunt, ut, niſi totus genius gravidæ exquisitiſſimè notus, fortuitæ etiam domesticæ, familiares, atque conjugales circumſtantiæ, quin ipſius prægnantis verus animi habitus ad amorem proliſ, & gloriam quaſi foecunditatis, perſpectiſſimus ſit: prætereà *accidentalium diætaeticarum* variationum rationes ſatis notæ habeantur: maniſeſtum ſit, non poſſe hîc quidquam reliquum ſaltim verosimilius, nedum firmius, ad ipſum foetum referri. Quamvis enim hoc, quod in ipſo præcedente §. indicavimus, de inſolitis quibusdam accidentibus, ſub alterius ſexûs geſtatione poſt plures diverſi prægreſſos partûs, huc quadantenus reſpectare videatur; quoniam tamen non ſolùm ſimpliciter *univerſale* non eſt, ſed etiam diſpar utique foret ratio, à qualicunque alia ſenſatione ipſius foeminæ, ad *ſigna* etiam *externo adſpectui*, & in primis in foemina, nihil ſenſibiliter alteratâ, obvîa: patet hinc ſatis inſufficientia talis etiam hujus qualiscunque argumenti. Tantò magis, cùm citata illa aliter habendi variatio & nominatim moleſtiæ ſenſibiles, tam puero, poſt multas puellas tranquilliùs geſtatas, ſuperveniant: quàm puellæ, poſt multos pueros, etiam inquietiùs geſtatos, quietior toleratio: & viciffim.

XLV.

Planè autem reverà peculiaris utique tranſumptionis eſt illud effatum, quod à Venatore originem ſumſiſſe notum eſt, de *Diverſo Situ foetus ſecundùm ſexum, in alterutro latere Uteri*. Quamlibet enim hoc in animantibus *multiparis*, *bicornem* ute-



rum habentibus, & pronum insuper situm corporis, non planè de nihilo sit; ut Ipse Dn. D. Præses, in cane gravidâ, cultro anatomico subjectâ, quinque foëtus complexâ, binos in singulis cornibus, & unum in communi alveo uteri, ante aliquot annos, Philiatrâ adstantibus, in *dextro* cornu & ipso utero tres *mares*, in *sinistro* cornu duas *fœmellas*, conspeximus: Ita est tamen longè utique dispar ratio humani, præsertim unici, foëtus: qui non solum *æqualiter* ab utero arctè *inclusus* est, sed etiam naturali situ, capite utique orificio hujus insistentis, reliquo proinde corpore conglobato, nec in utero, arctè amplectente, ullam diversam *inclinationem* habere potest; neque uteri universi certam & specificam *inclinationem* ad unum latus abdominis, ullo probabili modo causari. Unde, si maximè illud de *brutis multiparis*, etiam constans & indubium esset, nihil aliud innuere posset, nisi quòd è *dextro teste* seu ovario foëminino *masculini*; è *sinistro fœminini* foëtus expectandi essent: Nihil interim in *μωροτόκῳ* homine, & utero ejus foëtum arctè complexo, variante posthac foëtus ipsius situ. Possent autem, qui ita curiosi esse amant, & ad tales res otium sufficiens possident, illi etiam præjudiciali quæstioni commodiùs satisfacere, si v. gr. canibus fœmellis, alterutrum testem dextrè exsecarent, & sanatum iterum animal, quales posthac foëtus edat, & quàm constanter *unius tantum sexûs*, pluribus experimentis annotarent. Aliàs autem audimus narrantes fœminas, quòd, si cui prægnanti *macula constans* valdè *rubicunda*, imò aliquando insigni incremento, ad *inflammatoriam* & *abscessoriam* alterationem, sed segniùs tamen, progrediens, efflorescat, illa pro indicio *masculini* foëtus, in utero præsentis, haberi mereatur. Sed ut diximus, nihil horum est, cui insistere liceat, ut *certo*: minimè omnium autem, ut *perpetuo*. Adeò, ut etiam illa notabilis diversitas accidentium, sub aliqua gestatione, post grægressas alias paris semper sexûs, pro signo nunc concepti alterius sexûs *verosimili* quidem haberi possit, minimè verò *indubio*.



Ejusdem etiam censûs est, signum illud *Gemellorum*, ut in medio abdominis, quasi per longitudinem lineæ albæ dictæ, color ita mutetur, ut *fusca linea* appareat: aut, *planior* per medium, *venter* ad latera utrinque magis protuberare videatur. Quamvis enim utrumque *aliquando* contingere certum sit, neque tamen *semper* hoc fit, nec etiam, postrenum imprimis, in sola *Gemellorum* gestatione, verum etiam à *concrementis* aliis, aut *aquosi humoris* copia, unà cum conceptu, innidulante.

XLVII.

Inducit nos hujus ultimæ rei mentio, ut verba aliqua proferamus de *MOLA*. Quamvis enim hujus gestatio non propriè pertineat ad nostrum argumentum, nempe verè *Gravidarum* affectûs; quia tamen etiam, aliquando *cum fœtu* ipso, adhuc *concrementum* tale gestari contingit, breviter hanc quoque rem tractabimus. Dicitur nempe *Mola*, *concrementum irregulare membranaceum & fibrosum*, rariùs tamen *carnosas* fibras repræsentans, cujus *cavitates* qualescunque communiter *nigro sanguineo spissamento* suffartæ deprehenduntur. Quæ non cum fœtu, sed *solæ* gestantur, *junioribus* foeminis communiùs faciliùs decedunt, ut ad summum ultra *annuum* spatium non multum durent: *annosioribus* jam autem inhærent non rarò multò diutiùs, adeò, ut vel commoriantur, postquam *duos, tres* annos, quin *ampliùs*, illas obsederunt: Sicut variorum talium exemplorum indicem suppeditare potest *Moronus*. Sicut etiam idem indicabit exempla *vivarum, monstrosarum, imò maleficarum* talium quasi *molarum*, quæ *fœtum* etiam directè *enecare* censeantur, *rostro & ungvibus* conspicuæ, & quales illis locis familiares foeminis gravidis, *Fratres Lombardorum* appellari siveverint. Quomodò verò fiant, & unde ortum suum ducant, est quæstio tantò majoris momenti, quoniam non leve quasi præjudicium fovere videtur, nempe pro illis, quæ *extra Conjugium* molas excludere aliquando observantur. Cùm enim aliqui



decernant, non posse *molam sine cohabitatione virili* generari, incumbit certè his tantò majus inde præjudiciū. Cùm autem Recentiores tueantur, quòd etiam *lascivientibus* solum, citra Viri congressum, *ovula* decedere possint; eodem jure videtur statui posse, quòd etiam aliquando aliquod tale obhærescere posset, & ita incrementum capere; præcipuè, cùm etiam *nutritio* illa, quæ ipsi *Molæ* contingit, non possit assignari principio cuicunque, ut vulgò loquuntur, *plastico, regulari*, atque vero, à *Viri* congressu quomodocunque arcessendo. Interim, cùm utique tota quæstio de *Activitate formatrice*, etiam ad ipsum *regularem* foetus efformationem, sit res nullâ Theoreticâ luce usquam radians; quam tantò magis confundit energia *imaginationis* maternæ, nisi secundum planè peculiarem æstimationem intelligatur: Non dubitamus asseverare, quòd in toto hoc negotio nihil verè demonstrativi decerni possit. Illud autem pro certissimo habemus, quòd concrementa talia, ut ejus rei multa exempla novi Præses, originem familiarissimè ducere soleant, à *prægresso abortu*, & quàm maximè quidem plurimùm adhuc *immature*, atque inde non exquisitè atque penitissimè expurgatis *secundinis*, sed *retentis* qualibuscunque illarum laciniis. Sicut talium rerum specimina, tam, inquam, magnæ, quàm parvæ hujusmodi concretionis, allegata sunt in *Pathologiâ*. Momentum totius rei in eo versatur, quòd, cùm secundinæ *vivant vitam foetus*, adeoque etiam *vegetentur* seu *nutriantur* ab eodem principio, non autem materno; quòd *hic* nihilominus *nutritio & auctio*, nedum *vitalis conservatio*, *laciniis* hujusmodi evenire possit. Nam pro Uteri ipsius aliqua *excrecentia fungosa* *Molas* tales habere, vetat conditio illa, quòd tandem tamen adhuc ab Utero *decedentes*, exclusioni obsequantur; *decedentes*, inquam, non *abscedentes*: quod certè fieri non posset, si veriore aliquam *continuitatem* cùm utero haberent, ut *excrecentiæ fungosæ* omninò faciunt. Interim certè hoc argumentum etiam favere posset possibilitati, quòd ovulum, sicut, ex hypothesi, *sine Viro* per uterum *deduci* compos, etiam



etiam aliquando hoc *vegetationis* modò foveatur, citra activitatem qualemcunque *plasticam*, à cohabitatione Viri deducendam: cum utique etiam formatio *Molæ*, à vera & *legitimâ vi plasticâ* nequaquam, sed prorsus ab *equivocâ*, deduci possit.

XLIIIX.

Illud, quod de his rebus dici possit ad nostrum institutum, est, quòd *cum fœtu* conceptæ *Molæ*, & *fœtui* periculofam reddant *mansionem*, & ambiguum *nutritionem*: & *matri* communiter plurimas *perturbationes*, *angustias*, *anxietates*, *heteroclitos fluxûs* uterinos, & præsentius periculum intempestivi partûs seu *abortûs*, & tempestivi *partûs* varia periculosa *symptomata* & *confectaria*, machinentur.

XLIX.

Ultimò locò mentionem injicimus Accidentis certè oppidò rari, **SUPERFOETATIONIS**. Sicubi hoc evenit, rariùs contingit, quin etiam utrique fœtui, tam, inquam, jam grandiori, quàm superinducto recentiori, communis *Abortûs* periculum hinc impendeat, sed valdè *tranquillis* successibus, ille ad justum partûs tempus pertingat. Certò autem impendet *recentiori* conceptui, cum maturo etiam alterius partu, immaturus ita exitus, seu abortus. Rarissimis autem omnium exemplis, *recentioris* etiam, post editum grandiorum, *retentio*, & ad justum usque tempus gestatio, adeoque *vitalis* quoque *partus*. Verisimiliùs verò est, loco veræ *Superfœtationis*, formari ita illa, minimè pariter uti hæc, valdè rara, concrementa illa *molarum*, quæ *cum* legitimis *fœtibus* tandem in lucem prodeant. Non possumus autem hoc loco, quin leviter taxemus Practicam illam admonitionem, quæ speciminis loco esse potest subsumptionum irregularium: à *posse ad esse*, præter clinicam conspirantem efficaciam. Invenias nempe, qui de Generationis negotio tractant, *cohabitationem*, sub tempore *imprægnationis*, etiam hoc argumento prohibere, quia inde metuenda sit *Superfœtatio*, & ab hâc ultiores difficultates. Hic, quamvis de reliquo monitum illud



non improbandum sit ex aliis respectibus; præterea etiam certissimum planè sit, quòd omninò utique *Superfœtatio* non aliunde, nisi à *cohabitatione* tali ortum suum trahat: deficit tamen argumentum in eo, quòd rem reverà inter *numerosos* foeminarum *millenarios* vix aliquando inveniendam, tanquam *facilem & passim obviam*, conceptui ita præfiguret: Imò insuper, sub tam certa hujus ipsius causæ, nempe incontinentiæ conjugum etiam hoc ipso tempore, vulgatissima frequentia.

L.

Arbitramur satis absolvisse enumerationem *Affectuum*, *Gravidis* accidere solitorum; proximum est, ut breviter aliquid dicamus de *Causis* eorum. Breviter, inquam; quoniam & *pauciores* sunt, & pleræque *generaliores*: aliquæ verò etiam minimùm in *Artis potestate*, neque *præservativè*, neque *curativè*. Prima harum, & primaria *corporearum*, est insignis *Abundantia sanguinis*; & hujus deinde intuitu, paratior turbida inclinatio ad *menstruam exonerationem* affectandam: Unde *congestionem* atque *stagnationem* illæ symbolicæ, *hypochondriacæ*, & velut è longinquo ad *cruentos Vomitus* respectantes, quamvis *effectus* ipse ejus in *Gravidis* sit res omninò longè rarissima. Aliquantò verò propinquiùs fit utique hujusmodi inclinatio ad *hæmorrhoidales* eruptiones; quæ, licet etiam ipsæ æquè frequentes non existant gravidis, non sunt tamen etiam ita *valdè* raræ: inter tales, inquam, quæ sensibilibiora hujusmodi pathemata verè *hypochondriaca* his temporibus experiuntur, contumaciora, & diu insistentia. *Secunda*, & energię certè dignitate modò dictæ longè adhuc præponenda, est *animi pathematum* *Intemperantia*; utpote quæ etiam priori illi in actum, seu potius ad gravissimos effectûs, deducendam, præpotens existat. *Tertia*, sed longè jam mitior, imò debilior, est reliquæ *Diætæ* minùs considerans *Observatio*, tam in *assumendis*, quàm *Motibus & Quiete* decenter ordinandis: quin etiam in reliquis *Excretionibus* debitæ non rectè procedentibus. *Quartum* locum occupant *fortuita*,  
exter-



*externa, violenta*: lapsûs, graves offensiones, contusiones, &c. *Quintum* autem locum tenent etiam alii *Morbi*, aliunde gravidis oblatis.

LI.

Minimè verò veremur profiteri, quòd etiam *methodum* Gravidarum Affectibus efficaciter subveniendi, in nullâ aliâ re certiore ponamus, quàm in harum maximè *generaliorum* causarum *præoccupationibus*; Deinde verò in talibus *paucis* remediis, quæ non tam uni aut alteri hujusmodi affectuum, sed *plerisque*, imò ante omnia *præcipuis*, satisfaciendo, hoc ipso judicari possunt tanquam *appropriatam* energiam, ad *Uteri* ipsius œconomiam, possidere. Secundùm has intentiones, laudamus omnibus modis, & maximè seriò, pro junioribus, ut status *plethoricus* prudente *ventilatione* corrigatur. Tantò magis, si reliquæ circumstantiæ permittant, planè *antè, quàm* concipiant. Imo verò, pro habitu plenitudinis, non formidandam censemus etiam *repetitam* sanguinis missionem. Ubi nihil obstat dehortatio *Hippocratica*, cum illa de venæsectione illorum temporum loquatur, nempe *abundantissimâ*.

LII.

Administrationem hanc *Venæ Sectionis*, tam rationem *temporis*, quàm *loci*, & *mensuræ*, exactiorem requirere, non ita malè, velut unanimi consensu, judicatur. Quamlibet enim *Hippocratis*, & plerorumque antiquiorum ejus interpretum, monitum, quò *Venæ sectionem Gravidis* periculofam adstruunt, uti modò dictum est, unicè fundetur super *mensurâ largissimâ*, quâ illis temporibus Venæ sectiones adornari consueverant. Dum *moderatio* missio longè minus periculi creare possit: est tamen minimè negandum, quòd etiam in subjectis, nimium *sensibilibus*, *cautio* nunquam malè collocetur, quin potius non solum securioribus esse liceat, sed etiam tantò meliorem effectum inde expectare. Est itaque *TEMPUS* optimum, vel in *primis* adhuc conceptûs septimanis; nisi quidem adhuc *antè*, quàm conceptus factus judicetur, ventilationem hujusmodi instituendi suppetat occasio (quod tamen in ad-



*modum plethoricis*, maximi certè est usûs, adeò, ut vel aliam, sub gestatione evacuationem, *præoccupando* compensare possit.) Præcipuè verò quadrat huic scopo *medium tempus* gestationis: Quin etiam denique *ultimum*, proximè, intra unam aut alteram septimanam, expectandi partûs. Locus, commodè satis capitur, *Brachium*, & ipsa quidè *Vena Mediana* dicta. Interim in *Pede* Venam gravidæ fecare, minimè certè iusti singularis dubii objectum præbet: inprimis si incommoda aliqua præsentia, magis circa ipsum *abdomen*, maximè omnium autem circa *lumbos, coxas, & femora*, negotium facessant, de *rheumatico - arthriticorum* affectuum indole. [Ita quidem meritò certè temperare sibi deberent homines, ne nudis speculationibus indulgendo, ipsis rebus refellerentur. Ita enim v. gr. dum Practicus quidam, indicationibus curationes suas superstruere advefactus, foeminæ honestæ maritatæ gravidæ, *arthritico - Ischiadica* multiplicia pathemata perpeßæ, Venæ-Sectionem *in pede* præscribit, medio tempore gestationis; à quâ cum illa sensibilibiter levata esset, maximè tamen *plethorica*, tandem iterum similes dolores persentisceret, adeoque *repetitionem* hujus ejusdem auxilii, consensu Medici, susciperet: Differre hunc sermonibus suscepit alius, ac si non solum contra ipsa Artis, (sed *speculabunda*), principia egisset, sed planè, [quid enim non Medico mori & orilicet?] *intentati* ita malitiosè *abortûs*, alterum clam insimulare: Fecit certè hic prudentius, ut hæc omnia contemneret, ipso rerum eventu desideratissimam efficaciam confirmante; Insimulatio autem studii, abortum temerè inducendi, cum nulla in mundo compareret, sive civilis, sive simpliciter moralis, ejus rei probabilitas, apud paulò sensibiliores Divinatori illi, inconsideratissimæ malitiæ imputationem; apud æquiores autem ad minimum stoliditatis assignationem, conciliavit.] Minimè tamen negamus, quin, ad minimum propter hujusmodi odia, locum mereatur prudens æstimatio, quid hic verior *indicatio* svadere possit? Cæterum, quæ jam aliàs V. æ S. ni *adseverunt*, illis sufficere potest, ut *consuetudo* aliàs lo-



co emissio instituat. MENSURAM quòd attinet, potest illa satis comòdè instrui ad usitatos nostro climati mores, nempe ad 3. 4. Uncias. Imò verò, præstat etiam hîc potius, si quid exigere videatur, *repetendo*, quantum *sufficiat*, ventilare, quàm nimîâ emissionem *simultaneâ*, aliquod periculum quasi provocare. Interim tamen nec illud extra considerationem habendum, quòd, ubi *plethora* reverà gravat, & natura ad ventilationes respectat, etiam *nimiùm parca* emissio longè periculosiores turbas post se trahere possit, quando ita leviter solum sublevata Natura, mox suâ demum sponte ad excussiones largiores sese accingens, *pericula* illa demum in effectum deducit, quæ à sufficiente missione potius præoccupata fuissent. Pro Conclusionem hujus Commentationis repetimus, quòd in hujusmodi *tempestivis* ventilationibus ingens omninò momentum positum sit, pro *plethoricarum* periculationibus prævertendis; Adeò, ut illis, quæ jam aliàs sub tempore gestationis Væ S. ne usæ sunt, redeunte simili constitutione, etiam periculosius sit, illas simpliciter negligere. Maximè omnium autem, quæ manifestò *plethorica*, citra alias *patheticas* eminentes causas, *abortum* jam *incurrerunt*; his tantò magis *necessaria* potius, quàm simpliciter *utilis*, est talis ventilatio, sive quando iterum imprægnatas sese sentiunt, sive etiam antequam hoc fiat: ita, ut omnia alia consilia & auxilia certissimè *incertiora* sint, quàm hoc unum.

### L. III.

Inter illa *pauca* remedia, quæ innumus, non possumus connumerare, sed potius circumspeditioni debitæ commendare, *Balsamum Embryonum*. Sicut enim nemo cordatus seriò in se susceperit ullam *peculiarem energiam*, quâ ut *Embryonibus* utilis esse possit: sed in assignationibus *generalium*, nervos & *Spiritus* roborantium effectuum, subsistendum erit: Unde etiam eodem jure *Aqua Epileptica Langii*, *Apoplectica*, *Cordiales*, *Carbunculi*, *Vitæ Mulierum*, & variæ tales *odoriferae*, æquo jure *Balsami Embryonum* nomine notari possent: Ita oportet certè hujusmodi *aromaticarum*, *spirituosarum* *Aqua-*  
rum,



*rum*, *internum usum*, sub ea cautione æstimare, ne in *Matri-*  
bus *plethoricis* per ejusmodi rerum abusum, loco speratorum  
commodorum, vera *damna* promoveantur. Illud certum  
est, quòd, ubi vera præstò sunt *pericula*, non plus *Balsamò*  
*Embryonum*, quàm ullâ aliâ similium *spirituosarum* aquarum,  
quâlibet autem harum tam parùm, *salubris* effectus obtineri  
possit, ut speciosa sua nomina illò fulcire, nequaquam ipsis sit  
integrum.

LIV.

Eodem loco necessariò reponimus, quamvis etiam ad hos  
scopos non solita ut *directè* referri, varia *Carminativa calida*;  
nec non tracta huc, magis quasi directè, *Elixiria Uterina, aro-*  
*matica, oleosa, myrrhata*: utpote qualibus longè faciliùs in-  
commoda, à *turgesfactione* sanguinis vulgò dictâ, veriùs dedu-  
cenda foveantur potiùs, quàm cohibentur. Nisi fortè in val-  
dè *mucidis, phlegmatico-pituitosis* dictis, subjectis, aliquando  
locum inveniant, certò tamen etiam *temperatiorum* bonorum  
usu, satis feliciter compensanda. Sanè verò satis certum est,  
quòd moderatus etiam usus *Succinatorum*, bonæ, inquam, *Ess.*  
*Succini*, cum lenibus *Carminativis*, quibus *Rad. Pimpinellæ*  
*alb.* præesse potiùs, quàm accenferi meretur, non contemnen-  
dos usûs præstet. Unum autem remedium, quod tum per in-  
directum aliis communibus horum temporum incommodis,  
tum magis directè Utero, plus, quàm quicquam aliud, con-  
stantissimo experimento, adspirante divina Benedictione, sa-  
tisfacit, est Compositio *Mass. Pilul. Balsamicarum Dn. D.*  
*Præsidis*; Utpote non solùm nimios *affluxûs* atque *restagna-*  
*tiones* circa Uterum, temperans, quod vel in ipsis usque *eru-*  
*ptionibus*, ultra, quàm credi possit, præsentaneo effectû præ-  
stat: sed præterea etiam *Carminativum* edens effectum lon-  
gè optatissimum: *alvum* lenissimè expediens, quin reliquas  
etiam *Excretiones* placidè promovens; *Balsamica* etiam, ve-  
rè placidissimè *nervina*, efficaciam pollens, imò ita ipsum quo-  
que *sanguinem*, sine omni commotione, *attenuans*, ut nus-  
quam locus sit passivis *stasibus*, si *tempestivo* usu hujus medica-  
menti



menti sanguini prospiciatur. In ordinem tamen redacta, magis directis auxiliis, seditiosa ejus *abundantiâ*: quam utique neque hoc, nec ullum aliud remedium, auferre potest, aut ullo modo *corrigen*do veraci & *constante* effectu emendare. Quæ certè foeminæ ad hunc usque diem hujus remedii energiam expertæ sunt, aliis, assistente DEO, opus non habuerunt: quæ verò differentia ipsis inde ad sensum evenerit, in comparatione ad alia, in simili casu sibi aliàs ordinata, ipsæ commemorant.

LV.

*Adstringentium* usus, in commotionibus jam proximè eruptionem & excussionem minitantibus, si alia desint meliora, habetur quidem vulgò necessarius; sed monstrat etiam passim Experientia, quid inde *certi* & *perpetui* commodi impetretur; & elucidat eventuum talium causas ipsa etiam Ratio, nunquam certè approbatura, ut eruptio ipsa simpliciter *cohibeatur*, non *causis* solùm commotionis, sed vel ipsa *commotione*, non cohibitis, & in ordinem redactis. Non sunt in hoc genere contemnenda, quæ non tam simplici atque directâ, veluti rudi, *stringendi* energia pollent, quam potius *Tonica* singulari efficacia, Cujusmodi reverà haberi meretur Compositio illa *Specierum de Hyacintho*, moderatis etiam dosibus ad cohibendas *elisorias* commotiones non inefficax. Interim, si etiam hoc ipsum remedium simpliciter *commotionibus* objiciatur, causis illarum *materialibus*, *occasionalibus*, non, quantum sufficit, subactis, nec ab *heteroclitis* eventibus securis esse licet: neque, quod in præsens fortè qualicumque veluti *coactione* obtinetur, *stabile* proptereà aut *diuturnum* haberi potest, cui fidere liceat & acquiescere.

LVI.

*Animi Pathematum* uti nulla est *pharmaceutica* medicatio: ita effectuum tamen eorundem aliqualis occupatio, habet subinde locum: Tantò magis, ubi causæ aliæ *conjunctæ*, & tanquam veri fomites pejorum effectuum, unà conspirant. Sunt autem hujusmodi in primis *biliosa acrimonia*, sive *crassior*,



in primis adhuc viis exacuata; sive *tenuior*, in ipsum jam sanguinem diffusa. Destinantur talibus vulgò *Absorbentia*; & quadrant omninò priori plus, quàm alia quæcunque *Temperantia*; posteriori autem, nonnisi valdè segniter atque languidè opitulantur. Alteri verò huic subveniunt multò præfentiùs atque potentiùs, quamvis placidè utique etiam atque moderatè, *Temperantia*, nominatim *Nitrum*, peritè usurpatum, spernendo imperitorum inanes opiniones atque dubitationes: *dignorum, ut illa mala experirentur*, quibus *Nitrum*, efficaciam, ipsis & eorum similibus non solùm ignorata, sed etiam per calumniam in dubium vocata, *verè opitulatur*: non autem addam, ut illa *sine Nitri usu* curare necesse haberent; sed ut ejus efficaciam veram ita experiri discerent. *Commotionum* autem ipsarum proterviam, qui *Anodynis opiat* potest securè levare, illi artificium suum non invidemus; laudamus autem, ut inter talia, *Mass. Pilul. de Cynogloss.*, parcissimo etiam usu non otiosam: tantò magis autem *Cinnabaris* dextrum usum. Sicut etiam in *iracundiæ* incommodis, clausâ in primis simul alvò, *Rhabarbari* usus, tanquam generaliore effectû, non planè de nihilo est. Sicut autem ante nominatam *Mass. Pilul. Balsamicarum* bona fide ad commotiones à sanguine laudavimus: ita commendabit se etiam in illis, de quibus hîc sermo est, tantò magis tamen modò dictorum usui dextrè succenturiata.

LVII.

Illud autem feriò, & ut non temerè ad conscientiam meam testimonium provocare possim, opto illis gravidis Ego Præses, ut, quando quocunque tandem sive temporum, sive remediorum defectu, ad *elisionem præmaturam* foetus adigantur, tunc illis, tam propter *præsentia* gravia incommoda, quàm *subsequentia* etiam in posterum pericula talis medicatio obtingat, qualem ad hujusmodi casûs, modò iterum secundùm veritatem memorata hæc Compositio, non solùm simpliciter exhibere, DEO assistente, potest: sed qualem etiam ita præstare solet certius & efficacius, quàm alia quælibet vulgò laudari solita remedia.



Paucis mentionem injicere placet *Balneorum*; *Inseffuum* nempe, qui aliis propius circa Partûs tempus, aliis etiam maturius, placent. Non damnanda hæc sunt, modò *abundantia sanguinis* non excedat; nec etiam reliquæ ordinariæ *excretiones* plurimum segnes existant: nec immoderatus adhibeatur, sed *temperatus calor*: nec nimis præter modum illis *immo- rentur*: nec ab illo calore intemperantem mox *refrigeratio- nem* fubeant: nec, in genere, nimidò *sensibilior* sit constitutio in individuo, & in primis simul ejusmodi concalefactionis plenaria *Insuetudo*.

LIX.

Expectaverit quis à nobis, ut etiam de *Tumoribus Pe- dum* Gravidarum dicamus; sanè verò dicemus, si non æquè ad *ἀπεραντων* phantasiâ, tamen ad justum usum, imò veriùs directorium Practicum. Qui *ultra genua*, aut sanè ad ipsum *abdomen* usque non pertingunt Gravidarum tumores, tantò minoris reliqui periculi sunt, unde eò minùs urgent Curatio- nem, & recedunt tandem iterum etiam spontè, nedum conspi- rantibus dextris Artis subsidiis. Qui verò ipsum etiam *abdomen* invadunt, deterioris utique conditionis equidem sunt; inter- rim, quando vera atque certa subest *imprægnatio*, (quod ferè ignorari non potest, dum hi tumores communiter demum *posterioribus Mensibus* evenire solent), est certè omnis alio- quin efficax methodus illos tractandi, minimè consulta, sed provocandi Abortûs certius suspecta. Qui autem hujusmo- di *Tumores* jam inde à primis Mensibus se exerunt, ut omni- nò plurimis modis parvam spem boni exitûs, tam sui ipsius, quàm unâ implexæ gestationis, efficiunt: ibi præstat tamen re- verà, hos ipsos etiam nonnisi cautiùs tractare, certè postquam etiam sub quantâcunque circumspeditione, à talî constitutio- ne, promptissimè heteroclitî effectûs cooriuntur, ut in œco- nomia valdè perplexa. Cùm itaque, sive *evacuatoriis*, sive *catharticis*, sive *diureticis*, & utrinque quidem non levissi- mis; remediis, talium rudiorum *tumorum* curationes frustra



tententur; quandoquidem vulgares de talium curâ Scripto-  
rum passim transcriptæ præscriptiones, in necessitatibus rei  
præsentis, non plus usûs habent, quàm frivola fabulæ: est cer-  
tè propterea etiam in hoc genere nihil consultius, quàm *miti-*  
*gationi* potius *Symptomatum* qualemcunque, non autem di-  
rectè curationi seriam, intentionem & operam adhibere. Sic-  
ut enim sub gestatione, talium tumorum Curationem ple-  
nam sperare, reverà ἀπελκον est: ita tamen ad hunc scopum  
directè, & imprimis *medicamentis* seriò hunc scopum attin-  
gentibus, contendere velle, nihil est, nisi directam *Abortûs*  
aleam jacere. Cæterùm solvuntur etiam non ita rarissimè hi  
tales, reverà jam magis *Ascitici*, tumores, per *puerperii* pur-  
gamenta rectè succedentia, modò non reliqua corporis consti-  
tutio, jam ante imprægnationem, sive *phthisica*, sive *hectica*  
contumacior jam fuerit. Ceterùm his etiam, quibus leviores,  
crurum solùm, tumores tales eveniunt, utilissimum est, quan-  
tum usquam fieri potest, *ambulare* potius, quàm vel plurimùm  
*stare*, vel ita *sedere*, uti plurimæ solent, valdè humilibus sca-  
bellis: unde femora, juxta abdomen arctiùs compressa, vasa  
etiam ibi exeuntia cruralia fortiùs comprimendo, liberum re-  
fluxum sanguinis impediunt, & ita humorum stagnationibus  
extra vasa tantò majorem occasionem præbent.

LX.

*Duas* res in Commemoratione nostra affectuum Gravi-  
darum præteriimus, quas adhuc exequi expediat; unam magis  
*seriam*: alteram in opinione potius fundatam, nempe intuitu  
*causarum*, quæ ipsi à vulgò foëminarum assignantur. *Prior* est,  
*Concretio p.n. secundinarum*, extra placentam, *cum utero*; alte-  
ra, *Circumvolutio funiculi umbilicalis* circa collum infantis.  
*Prioris* causas quærunt partim in nimia *desidia*; partim in  
ventris gravidi, turgidi, postremis Mensibus, quotidianâ multa  
obversione ad ignem, ut inter coquendum foco constanter  
adstantium: unde vero non absimile est, non quidem æquè  
nuda *exsiccandi* ratione, sed veriùs *caloris*, ad operandum re-  
verà excitantis, efficacîâ, occasionem subnasci, indecentis stru-  
cturæ,



cluræ, nempe per fibras inusitatas *connexoriæ*. Hujus quidem Accidentis, cum nulla verosimilia, nedum evidentia, dentur signa, est inde tantò minor occasio illi directè occurrendi: ut potius nonnisi ut in eventum, aliquid hîc tentare aut cavere liceat. Commendant autem vulgò huic scopo frequentiore abdominis litum, postremo gestationis tempore, per *Spiritum ardentem* etiam vulgarem, *Aniso* aut *Carvo* imbutum: Conducerent autem melius teneriores *pinguedines*, *gallinacea* aut *anserina*, si aliqua rei suspicio justior occurreret. Omnium autem optimum fuerit, ipsas illas causas, quibus talis eventus verosimiliùs imputari possit, evitare, quàm postea demum jam inductum effectum iterum corrigere velle.

LXI.

*Alterum*, de quò dicimus, Accidens, ipsis maximè partûs succésibus aliquando negotium objiciens, est *Circumvolutio funiculi umbilicalis* circa corpus, aut planè collum, foetûs. Imputant hanc rem vulgò mulieres gravidarum motibus corporis sursum fortiùs extensoriis, dum v. gr. aliquid ex altiore loco aut repositoio depromere suscipientes, corpus & brachium fortiùs sursum protendunt. Ab hoc Matris motu *circumagitari* foetum in Utero arbitrantur. Sed profectò nulla usquam verisimilitudine; dum potius longè propius est fidei, quòd hujusmodi volutatio longis atque tardis progressibus potius, quàm repentino hujusmodi actu, absolvatur. Ceterum, neque *signum* est hujus rei, neque verosimile remedium *pharmaceuticum*, imò neque *chirurgicum*, nisi in ipso *partu*. Reverà tamen hîc etiam plus fortunæ bonæ succésus, quàm nuda & infallibilis dexteritas manualis operationis, valet: ut videlicet ea utique, sub ipso tempore operationis necessariæ, offendatur uteri non planè firma strîctura, sed remissio ita sufficiens, ut ad mouendum foetum liberius spatium suppetat; quamvis ita etiam adhuc non leves difficultates, tam circa *certitudinem facti* ipsius, quàm circa *latus*, *versus quod* foetus volutari debeat: re-  
pe-



petendam quoque plus semel volutationem: imò integram circumvolutionem adhuc intra secundinas: prudenti pensitationi non possint non rem totam in summum dubium adducere.

LXII.

Tandem demum ex omnibus his rebus sine difficultate resultat, quale esse debeat etiam ipsum *preservativum & conservativum Gravidarum Regimen*? Circa hoc, ut omnis inutilis prolixitas evitetur, convenit utique nullum aliud, nisi quàm maximè *ordinarium*, sano statui aliàs quoque conveniens, modò hîc tantò magis ferium, temperamentum omnium rerum non naturalium: Interim ex illis verè utique peculiarem omninò locum sibi vendicant *Animi Pathemata*. Sicuti autem, porrò, par hujus temperantiæ tenor per totum gestationis tempus securissimè omnium servatur: ita est tamen notatu non indignum, quòd errores in *assumptis* adhuc plus incommodorum objiciant *primis* Mensibus, quàm *postremis*: *Animi* verò *pathemata*, *primis* maximè & *ultimis* Mensibus plus periculi ad *Abortum* minentur; *Imaginatio* verò præcipuam efficaciam exerat *ultimis* Mensibus. Unde tantò plus usûs hîc habebit etiam secundùm has circumstantias, quicquid necessarium est, rectè & decenter ordinasse.

LXIII.

Antequam autem finem dicendi faciamus, non abs re erit, & credo desiderari jam ab aliquibus, qui hucusque perlegendi patientiam habuerunt, aliquot adhuc verba facere de FEBRIBUS, si Gravidis accidant, quid sentiendum sit, aut statuendum? Hæ, cùm vel *Intermittentes* sint, *chronicæ*, vel *acutæ*; uti priores, veræ & *legitimæ*, nullum magnum periculum patientibus ex se portendunt: ita nec ipsis quoq; gravidis æquè nimio plus timendæ sunt. Quòd maximè propterea considerandum est, quoniam trepidatio circa tales, interdum repentinas *ancipites* curationum *tentationes* patientibus persvadet, è quibus demum *deteriores* consecutiones, ali-



bi à *Vomitoriis* intemperantioribus methodis, alibi ab intempestivè *suppressoriis*, & ordinariorum evacuationum cohibitoriis, introduci possunt. Unde quidem, licèt etiam in quibuslibet patientibus, turbulentioribus tentaminibus præferenda, tantò magis tamen pro Gravidis eligenda utique est, *lenior* potius, sed *legitima*, his Febribus medendi ratio, ne præter rem aliquid turbarum concitetur. Sciendum tamen etiam simul, quòd *intermittentes* febres, etiam *Tertianæ*, in Gravidis plerumque adhuc *contumaciores* sint, quàm in aliis subjectis. Verisimillima hujus rei causa, quòd etiam sub hujusmodi commotione, licèt langvidius *excretoriâ*, respectus ita aliquis veluti formetur ad contentum in hoc casu in *abdomine*, à corporis ipsius oeconomia utique *diversum*, adeoque suo modo *alienum*: quod licèt cum qualicunque *impetu elidere*, intentio non ferat, tam parum, quàm vel passim directam *febrilem* materiam: tamen tantò pertinacius repetantur, imò retineantur, quantumcunque è longinquo eò collineantes velut *intentiones*, id quod etiam simplici *Tertianæ* directæ non inusitatum, sed passim familiare est. Illud certum est, quòd, quàm parùm periculi in ipsis quoque Gravidis habent hæ febres modestius tractatæ, eò certiùs tamen, imò etiam pronius, in heteroclitos successus, *anomala*, imò ipsa *acuta*, schemata inclinent, si alienioribus, aut *turbulentioribus*, ausibus perturbentur, inprimis autem, *non sublata causa*, simpliciter reprimantur. Ubi præsertim iteratæ reversiones, quas *recidivas* vocant, magis magisque obstinatissimam reddunt febrem: intempestivæ verò vehementes cohibitiones, Gravidas foeminas, inprimis à fortiore corporis motu alienas, longè præsentius in valdè fonticos *tumores* conjiciunt. Neque verò inusitati sunt Casus, ubi, posterioribus Mensibus, *suppressæ* febres post partum denuò revertendo, per puerperii tempus novum negotium facessunt.

LXIV.

*Acutæ* Febres semper *periculosæ* sunt Gravidis, nisi quidem vel sponte benignius segerant, vel arte etiam ad mo-



*derationem*, quantam unquam fieri potest, adducantur; *lenissimis* utique, & maximè *temperantibus*, methodis; *excretionis* autem, *diapnoicæ* magis, quàm ullius alterius, studiosissima conservatione magis, quàm usquam intemperantiore illius, aut potiùs in ordine ad illam, sanguinis exagitatione. *Periculum* autem, quod per febres acutas Gravidis ingruit, est præcipuè *Abortus*; non tamen hoc unicum, sed &, per *evacuationes sanguinis* unà contingentes, heteroclitus solitæ *periodi* eventus, adeoque totius summæ morbi periculosior exitus. Quo intuitu opus certè hîc est cautione, quæ verò in nulla re certiùs consistit, quàm in moderatissimâ, tam regiminis, quàm medicamentorum *proportione*: qualia utraque si non satisfaciant, calamitosa est sanè res. Hîc certè usus esset decantatis ejusmodi *fætum & conceptum roborantibus*, ne in illum vis aliqua ingrueret: sed apage hinc *Balsamum embryonum & Adstringentia*, nisi promoverè potius, quàm amoliri consecutionem *Abortûs*, ab acutis febribus velis. *Ventilationes* autem tempestivæ *sanguinis* per tempus *gestationis*, tam *præoccupandis*, quàm, si utique eveniant, *mitioribus servandis*, acutis febribus, non poenitendum usum utique habebunt: in ipsis autem jam coortis hujusmodi febribus demum V. Snes aggredi, *speculationi* quidem probabile est consilium; *practicæ* autem observationi, & qualicunque certiori *fiduciæ*, non solùm impar, sed reverà potiùs, si omnia rectè observentur, quæ sæpiùs fiunt, etiam positivè *anceps*: nempe, ne potiùs *excussoriæ* commotioni demum reverà ita velut occasio præbeatur: sicuti de illa re in genere pluribus egit, & certè illam solerter praxin tractantibus commendat Dn. D. Præses Disput. de V. Sne in acutis.

LXV.

Ultimo loco, ut adhuc verba aliqua adjiciamus de EXPECTATIONE, Gravidis interdum necessaria; dum partus secundùm ipsarum formatum *calculum* justò diutiùs cessare videtur, est ante omnia certiùs, quòd hoc sincerè vix unquam fiat: Nisi vel computum suum, à *Mensibus*, ab alio vitio



vitio, semel aut iterum *restantibus*, præmaturè orfæ; vel etiam alioquin Mensium *minùs ordinato* successui obnoxia sint. His, quæ ordinatum habent *statum* Mensium fluxum, si *medio* gestationis tempore *motum fœtus* annotaverint, & ab illo tempore *viginti Septimanas* numeraverint, si harum finis non in tempus incidit, *Mensium* consuetæ evacuationi respondens, certiores esse debent, quòd eò dirigere calculum necesse sit; & quidem, si illud tempus proximè *ante* exitum harum viginti Septimanarum cadat, quòd etiam partum ita *maturior* expectare deceat. Sin autem tempus hoc, mensium evacuationi respondens, adhuc *ultra* terminum, à *fœtus motu* numeratum, se extendat, quòd tunc etiam *partus* potius adhuc tantisper *expectandus* veniat. Quæ verò foeminæ *statum* mensium tempus non habent, imò vel solùm à *phasibus Lunæ* potioribus alienum, illæ nihil hîc possunt adeò *exquisitum* expectare; sed eò ipsò neque necesse habent trepidare, si non ita ad amissum, & ut illæ volunt, usitata sua formula: *sie habe keine Stunde mehr vor sich* exactissimè obtingat. Si foemina partui propinqua de reliquo satis ad tolerantiam *sana* appareat, nihil habet, quod de Partûs tarditate ultra calculum suum metuat: Sicut etiam, quæ satis distinctum *Motum fœtus* in utero adhuc subinde percipit.

LXVI.

Cui verò, à quòcunque accidente, valdè probabilis suspicio infidet, quòd fœtus suus, vim alicunde passus, *vitæ* suæ periculum adiverit; illa sequentia habet, quæ cogitet. Si *languere* inde solùm, seu ægro-tare, fœtum contingat, partûs tempus propter *ægrum* fœtum nihilò magis *tardum* expectandum fore, nisi quidem potius solito *maturius*. Sin autem fœtui *vitam* planè *decessisse* metuat, advertendus est animus ad illas circumstantias, quas Gravida in se ipsâ sensit ab eo tempore, quò ejusmodi mali eventûs suspectam occasionem perpeffa est. *Mortuo* fœtu, Gravidam nihil, aut valdè parùm, alterari, vix unquam contingit, nisi fortè in robustissimis, & de insignibus etiam alterationibus parùm quiritari adsvetis. *Diutius* languentem fœtum si tandem emori contingat, matris etiam *langvores* sensibiles, *animi* irrationalem *angustiam*, quin alia, inprimis tamen *horridula*, etiam universi corporis incommoda, usitatis-simum est succedere: imò increbescere hæc magis magisque, cum *malo*



*foeminae colore*, quin vehementioribus tandem passim pathematibus: deficiente verò posthàc in solidum foetus *motu*. Quando verò *repentino* quodam imperu, vegetus eò usque, foetus vitam amittit, nunquam hoc fit sine valdè *sensibilibus* Matris alterationibus: inprimis *horrore*, febrilem insultum æmulante; deinde etiam succedente *calore* febrili, sed non æquè verum typum formante, sed *anomalo* magis, & lentæ similiore, nisi quidem maturè foetus mortui *exclusio* sequatur. Reverà verò neque etiam ipsius foetus mortem æquè facile sequitur *insignis* Partus *retardatio*, nisi quidem ille *languidissimè* interierit, foemina, de reliquo quidem non æquè *morbida* constitutionis, indolis tamen sit segnioris aut timidioris. Aliàs enim non *apparatus* solùm ad excludendum, sed actus potiùs ipse exclusionis, certò non tam admodum tergiversatur. Secundùm has itaque circumstantias potest Gravidà suam conditionem, respectu suspecti statùs vitæ foetus sui, judicare.

#### LXVII.

Excusavimus nos jam suprà, quòd de *MOLA*, tanquam ex instituto tractare, non teneri nos sentiamus. Interim, cùm aliquid æquivoci interdum obijciant *Molæ*, circà tempus partus expectati, placet adhuc brevibus indicare, quæ nostro negotio propiùs conveniunt. *Mola*, cum foetu simul gestata, difficiliorem quidem reddere potest partum, imò etiam aliquando tempus ejus intempestivæ *anticipationis* exponere: Ultrà solitum autem terminum *extendere* minùs familiariter solet. *Sola* verò *Mola*, inprimis quæ utero *directè* quàm minimum negotii facessit, (neque *fluxibus* inordinatis, nec *inflatione* ipsius etiam uteri eximia,) tolerari sæpiùs observatur ad tempus, legitimam gestationem plurimùm excedens. Unde quidem tantò magis animum advertere Foeminas addecet, ad solerter discernendum sensum *Motûs*, utpote qui in hoc genere verum est unicum *κεῖν ἡγεῖον* *Molarum* à genuino conceptu distinguendarum. Interim certum hoc est experientiæ testimonio, quòd, licet utique vero foetui, inprimis jam *robustiori*, pares *motûs* *vividiores*, *Mola* per rerum naturam nunquam imitari possit; familiariter tamen ferè foeminae tales ita confundantur *obscurioribus* quibusdam sensationibus, ut obtusos fortè infantis motûs illos agnoscere, vix dubitent. Interim, habet hîc reverà optimum usum hæc distinctio, ut usquè ad debitum partui tempus, æqualiter prorsus *obscuræ* manentes hujusmodi perceptiones, longè verisimiliorem reddant *Molæ*, quàm genuini foetus, præsentiam.

#### LXIIIX,

Tantò magis autem confirmant hoc circumstantiæ illæ perpetui quasi *irregularis Fluxûs uterini*, toto gestationis tempore intercurrentis. *Inflatio*, mox à primis septimanis citò admodum, augescens, cum variis quasi continuis ferocioribus commotionibus *flatulentis* atque *spasticis*: imò etiam aliis insolitis ex utero *emanationibus*, & ferè etiam ipsius foeminae ita affectæ



fectæ insolita *taciturnitate*, & aliis anxiiis *penſitabundis* moribus. Hæc, inquam, quantò magis cum illo nimis incerto & *obscuro* motu in utero concurrunt, eò certior est *Molæ* suspicio. Quando itaque sub hujusmodi circumstantiis, partus *ultra* debitum tempus remoratur; non est propemodum ulla alia justa suspicio, nisi de *Mola* præſente.

LXIX.

Sicut autem legitimi *fætûs* ita tardantem exclusionem, ut etiam nulla unquam indicia verorum *Partûs dolorum* occurrant, *arte* quantumcunque directâ provocare velle, certè temerarium esset coeptum, nisi dexterrimè, & inprimis *môderatissimè* geratur: ita *Molam* quoque, cùm signa ejus vix unquam ita absolutè *indubia* sint, *ante* legitimum tempus *partûs*, *directo* impetu, tanquam simul & semel exturbare velle, est certè etiam ipsum ausus admodum ambiguus. Tantò magis, cùm reverà in aliquot *septimanarum*, imò *Menſium*, morâ, nihil usquam effatu digni periculi versetur, quin nempe etiam tunc adhuc satis matura obtingere possit exclusio. Ubi nempe metûs illi, quòd tali *morâ mola* vel nimium incrementum capeſſere, vel nimio firmiùs utero accrescere possit, reverà magis in *speculatione*, quàm *experientie* suffragio, fundatur: unde neque hîc aliquid temerè turbare convenit; interim *sanguinem ventilare*, antequam *expulſioni* directè opera detur, non inane erit consilium.

LXX.

Ultimo loco mentionem facere placet *Concuſſionis* corporis gravidarum mediante *Vecturâ*. Talis, si penitùs *insuetis*, nimium vehemens, & inprimis *alvò onerata*, sed *obſtipatâ*, obtingat, potest occasionem præbere, in valdè sensibili diathesi, variis certè incommodis, ad ipsam usque *elisionem* *fætûs* proritandam. *Moderatior* autem, non solùm *postremo* tempore, sed planè *proximis*, quibus partus expectatur, *diebus*, boni potiùs est usûs, inprimis si omnia reliqua satis commodè se habeant, & *alvus* etiam respondeat; quod quidem semper utile est gravidis. Maximè omnium autem conducit talis corporis motus illis, quæ *vecturæ* aliàs etiam liberaliùs *adsuetæ* sunt. Ita enim demum non rarò & promptiùs sequi, & satis liberè succedere, partus ipse observatur.

S. D. G!





# DN. CANDIDATO

PRÆSES

S. D.



Vantumvis locus ille, Genes. IV. 26., diversis modis explicetur à philologis, insistentibus interim Judæorum non paucis, neque postremis, explicationi, quòd Enos tempore profanatum sit Nomen DEI: unde etiam ipse Maimonides libellum suum de Idololatria, quamvis non disertè super hunc textum, tamen super hanc ejus acceptionem, fundare legitur: & quicquid etiam alii hîc è Grammatica contradicant: certum tamen illud, imò velut evidens est, verum fundum totius Idololatriæ nullum alium agnosci posse, nisi invocationem DEI inversam, per nomina varia potestatum Ejus & actionum, secundum objectorum multitudinem, multiplicium: utpote quæ maximè diffusio, imò evagatio, secundum varios respectûs, unam DEI Omnipotentiam, ut rem multiplicem intuendi, tenebricosam illam abyssum sine dubio objecit πολυπραγμοσύνη volaticæ mentis humanæ, ut multiplices effectûs, etiam multis diversis Agentibus adsignaret. Sicut autem sibi veluti relictâ fatua mens humana, in hos scopulos facilè impingendo, gentilium Diis numerosis originem dedisse apparet; [quanquam reverà in ipso fundamento etiam uni Divinitati has eminentes potestates adscripsisse ex eo agnosci possunt, quòd etiam numerosa illa sua Numina, non aliunde, nisi ab hoc uno Deos judicaverit, quòd supremam talem potestatem obtineant, quæ ita, ut in se considerata, propriè sit una Divinitas] ita summo certè studio summaque vigilantia cavendum erat illis, qui etiam revelato DEI verbo faniùs edocti sunt, ne ipsi quoque in hæc præcipitia agantur, & perversa applicatione, in ipsâ re cum paganis consentientes, solis fortè verborum fucis mentis suæ caliginem colo-



colorent. Sanè verò ingentem in hoc genere confusionis occasionem suppeditat usitatissima illa loquendi formula: DEUM agere per media. Quæ, ut ex parte DEI, sana penitus haberi, & quàm maximè agnosci potest; ita cavendum tamen summo venit opere, ne temerè recepta illa deteriore loquendi formulâ: DEUM indidisse talibus mediis illam energiam: salutarem ita Ejus perennem influxum, ad salutare omnino & optabiles rebus humanis usûs, ita separemus, ut in solis mediis æquiescentes, DEI Ipsius parvam, imò passim potius nullam recordationem retineamus, sed dum Illum per scholasticas ætiologias Primam causam declaramus, non tam dignitate, uti decet, quàm ordine atque serie procedendi, æstimatâ, hoc ipso remotissimam judicemus, ut moniti nihil aliud respondeamus, imò veriùs sentiamus, quàm usitatum illud: *das versteht sich vorhin*. Enimverò certè in Medicina, multis modis hujus offensionis ferace, in potestate habere considerationes suas hâc in parte, convenit; benè, inquam, & sollicitè discernere respectûs illos, 1) quid media verè & constanter agant; à DEO, inquam, ad illos effectûs directè & quasi simpliciter instructa, & in perenni energia conservata sentiantur: 2) quid DEUS aliquando agat utique per media, sed non modò dicto illo directo & ordinario actuandi modo, quem adeoque semper sine circumstantiis quàm maximè ad DEUM reflexis, ipsum medium toties quoties, quasi secum trahat, afferat, imò inferat: 3) quid utroque respectu constanter in animo habere conveniat, circa referendam ita ad DEUM illam energiam; nempe etiam in ordinaria, reminiscendo, quòd DEUS illam extra ordinem quidem, sed facilè tamen pro sua potentia inflectere possit contra ingratorum vota: in extraordinaria verò, quòd illam mediis, etiam propter politicos usûs, directè vindicare, minus certè reverens haberi possit; nedum ut ita utrinque tandem in oblivionem devolvamur, certæ divinæ cooperationis, perpetim exoptandæ. 4) Quàm scandalosum ita habendum sit illud, quod certè pervulgatum est & usitatissimum, cùm vera mediorum utilitas ab ipso DEO ita proficisci agnoscenda veniat, talibus rebus, quæ nihil hujus à DEO habent, ingentes, &



& reverà veluti divinas vires, passim vendicare, adeoque de DEO reverà falsissima nugari, & veram Ejus Bonitatem atque Potestatem ita temerè in alios usûs & respectûs, contra secundum Præceptum, in vanum prætexere. Dies autem me destituat priùs, quàm potiora circa hanc rem offendicula exemplis in Arte nostra Medica elucidem: Intelligenti tria verba sufficiunt. Tui verò occasione, Nobiliss. DOMINE CANDIDATE, de hac materia verba aliquot proferre inclinavit animus, postquàm Te perspecta affatim habere hæc talia, satis sciam, imò detestari, quicquid in hoc genere, quàm DEO debemus Reverentiam offendit: alta verò mente repositum gerere, quanta sit divinæ Potentiæ & Clementiæ & utilitas, & necessitas, ad dirigendam mentem, pro inveniendis veris mediis, & excitandam veram energiam, ab Ipso destinatam pro salutari effectû. Tu, postquam pluribus jam annis, tam in Regio montanâ, quàm Fridericianâ nostra, Regiis Academiis, industriâ atque diligentia ad exemplum idoneâ, juxta cum ingenii maturâ dexteritate felicissima, Arti Medicæ strenuam operam navavisti, & non audire solùm, sed intelligere, quæ digna potius, quàm quæ dicta solùm, essent, cordi habuisti: imò ipsi quoque Praxi solertissimo studio operatus es: pro reliqua etiam tua DEUM verendi atque colendi maxima curâ, ita certè gnarus es supremi illius nexûs, quem Medica Ars habere debet cum Naturæ inditis, & perpetuò adhuc exorandis, Divinæ Clementiæ Beneficiis, ut apud memorem hæc ipsa proloqui potuerim. Perge ita, ut cœpisti, & decurre, tanquam regia hâc viâ, hoc vitæ atque Artis stadium: Ita Tibi & omnia cœpta tua, & hi etiam, quos nunc capeffis ex merito, Honores & Immunitates decori erunt exoptatissimo, usui publico, solatio proximo, imò universæ nostræ Arti veriori ornamento. I felix, age feliciter; capeffe lucrum fœcundissimum & unicum honestissimum εὐσεβείας μετ' αὐταρχείας, fac diligenter opus, fer patienter onus; ita DEO charus eris, & hominibus, bonis: abunde est. Vale!

Dabam ex Museo Nonis Septembris, Anno  
M DCC VIII.